

周

官

恒

解

周官恆解卷二

地官司徒序官

雙流劉沅輯註

徒者民也掌土地人民
養教之事故曰司徒

惟王建國辨方正位體國經野設官分職以爲民極乃立地官司徒使帥其屬而掌邦教以佐王安擾邦國

邦教下文所言皆是擾順也養教民生所賴也順民性而安之故曰安擾御案曰成均所教秀民而已土地人民皆隸於地官而親民之吏屬焉必地官掌教乃能盡天下而無人不教

教官之屬大司徒卿一人小司徒中大夫二人鄉師下大夫四人上士八人中士十有六人旅下士三十有二人府

六人史十有二人胥十有二人徒百有二十人

教官之屬統下六十官而言大司徒以下則主天下六鄉之官也師德行可爲一鄉之師長者旅府史胥徒分佐其事

鄉老二鄉則公一人鄉大夫每鄉卿一人州長每州中大夫一人黨正每黨下大夫一人族師每族上士一人閭胥

每閭中士一人比長五家下士一人

比毗志反

鄭康成曰百里內爲六鄉外爲六遂老尊稱也公卽二公一公掌二鄉不列其職掌蓋以道倡率一鄉地優體尊不煩以事也卿卽六卿王制曰諸侯之上大夫卿則卿固可謂之大夫六卿兼鄉官凡軍旅田役皆鄉官令其屬帥民而致與大司馬軍將皆命卿相合王氏應電曰周官之法在朝則爲六官在國則兼鄉遂之官及都

鄙之君故平姑則六卿各教其所治民不必別立守令
國有大事而致民則六卿各率其鄉遂之民而守不必
別有徵召國有大故則六卿各糾其民而守不必別有
長帥其有會同師役而用眾則六卿各帥其都家所統
之民而往不必別爲之將觀夏書甘誓乃召六卿卽六
事之人則此法自古已然其族師而下皆使民自推擇
其長因而秩之耳故曰使民興賢出使長之使民興能
入使治之也薛氏衡曰以公卿之尊下領六卿之治重
教事也三公不列職明道德在躬無往而非教也以六
卿爲六卿之大夫明治禮刑政事皆所以爲教也六官
之屬各有府史司徒而卿則無之卿大夫受教法而頒
之於鄉史凡羣吏之周旋於鄉以行教事大抵皆身親
之且鄉師爲教官之攷府史胥徒具列文書調度不患無人也

封人中士四人下士八人府二人史四人胥六人徒六十

人

聚土曰封封其四疆以畫
界胥徒多以繼封事廣也

鼓人中士六人府二人史二人徒二十人

祭祀軍旅田役喪紀災祲夜藝
及田法習戰之節制皆用鼓

舞師下士二人胥四人舞徒四十人

主教野人之舞
習民於禮樂

牧人下士六人府一人史二人徒六十人

養牲於野田者其職止
芻牧之事故官下士

牛人中士二人下士四人府二人史四人胥二十人徒二

百人

養公家之牛雖主一牲而牢禮屬犒會
同軍旅行役任載皆用之故官爲中士

充人下士二人史二人胥四人徒四十人

充猶肥也謂官以堪入祭祀者送付牧人至祭前三月選入充人芻之使肥

載師上士二人中士四人府二人史四人胥六人徒六十人

載師閭師縣師遺人均人之長蓋熟知地利量其地而爲之制使無曠無過

閭師中士二人史二人徒二十人

同居一巷之門曰閭閭師周知民之盈歉情偽故使之徵稅其賦貢入太府穀入倉人

縣師上士二人中士四人府二人史四人胥八人徒八十

人

主稍縣都軍賦之事縣居
稍與都之間故以名官

遺人中士二人下士四人府一人史四人胥四人徒四十

人

遺俞
李反

遺饋遺也主施
惠振救之事

均人中士二人下士四人府一人史四人胥四人徒四十

人

鄭氏康成曰均平也
主平土地之力政者

師氏中大夫一人上士二人府一人史一人胥十有一人

徒百有二十人

鄭氏康成曰師教人以道者之稱賈氏公彥曰以教國子故使中大夫爲之國子眾使役處眾故其徒多

保氏下大夫一人中士二人府二人史二人胥六人徒六十人

鄭氏康成曰保安也以道安人者也賈氏公彥曰與師氏同教國子官與府史別者以其教國子雖同館舍別所故置官有異

司諫中士二人史二人徒二十人司救中士二人史二人徒二十人

鄭康成曰諫者正也以道正人之行救猶禁也以禮禁人之過恩按既立師保以教民又有司諫司救以匡其

失蓋糞糊罰懲皆在其中矣

調人下士二人史二人徒十人媒氏下士二人史一人徒

十人

民相爭則調人剖其是非而和合之媒氏和合婚姻以成六禮皆禮讓之要事

司市下大夫二人上士四人中士八人下士十有六人府
四人史八人胥十有二人徒二十人質人中士二人
下士四人府二人史四人胥二人徒二十人屨人中士二
人下士四人府二人史四人胥二人徒二十人

質如字

司市市官之長統下質人至肆長諸官市易爭易爲故
司市掌其政而質人則使交易者兩相宜兩相悅而已

爲之質也。屬市中空地爲舍以樓交易者其地本官地故以屬人掌之而不加法者則征其在。

胥師二十肆則一人皆二史賈師二十肆則一人皆二史司疏十肆則一人司稽五肆則一人胥二肆則一人肆長每肆則一人

胥師以下非官也皆司市所自辟除之人蓋卽以其地之人爲之胥者有才智之稱師長也肆謂行列賈師知物價者司疏主在市疏亂之人司稽主稽察市中來去者皆給徭役於司市

泉府上士四人中士八人下士十有六人府四人史八人賈八人徒八十人

泉或作錢以其掌市之征布故列於地官與外府屬天官者異薛氏衡曰市民情僞易滋董以司市賈人賈其

成廛人斂其布各以士爲之大綱舉矣猶慮不足以盡防使精於伺察者爲胥師明於物價者爲賈師司疏禁鬪器司稽執盜賊曲爲之防尤慮商賈有淹沮之虞齊民有倉卒之需設爲泉府之官以廛人之征布而斂散之以濟市政之窮所以欺詐不生而民用無缺也

司門下大夫二人上士四人中士八人下士十有六人府二人史四人胥四人徒四十人每門下士二人府一人史二人徒四人司關上士二人中士四人府二人史四人胥八人徒八十人每關下士二人府一人史二人徒四人

王城十二門非位尊權重管鑰之任不得而糾詰之故王之以下大夫關界上之關由門而出者必至關白關而入者必至門司關稽察無節傳及貨賄不物者故關十有二每關府一人史二人徒四人已足以待其事無

所用眾也司牧閉者不過下士無所司威權也蓋周制
聯眾庶與士庶子爲一體民卽兵兵卽民平日德政足
以結之法令足以維持之不似後世門
關之禁日酷而民與商均受其病也

掌節上士二人中士四人府二人史四人胥二人徒二十
人

節符節行者執以
爲信無者不達

遂人中大夫二人遂師下大夫四人上士八人中士十有
六人旅下士三十有二人府四人史十有二人胥十有二
人徒百有二十人

六遂百里至二百里地遂人通掌縣鄙溝塗形體之法
所掌稽事爲多如有天時雨澤水潦等變當隨時酌其

利而爲之蓋亦就其地之賢能者選以爲之

遂大夫每遂中大夫一人縣正每縣下大夫一人鄙師每

鄙上士一人鄙長每鄙中士一人里宰每里下士一人鄰

長五家則一人

節作管反

縣鄙鄆里鄰皆遂之屬而以遠近多寡別其名遂大夫各主一遂似鄉大夫各主一鄉但鄉近而遂遠鄉狹而遂廣故其官皆卑於鄉官各減一等

旅師中士四人下士八人府一人史四人胥八人徒八十

人

旅以羈旅爲名蓋間有新阡受屬者擇其安置之其尾粟開粟耨粟掌之春耕秋斂不足則補給之有餘則收

斂之地廣故
官屬胥徒多

稍人下士四人史二人徒十有二人

稍所
教反

若有會同師田等事稍人有縣師
之令而備其芻糗等物故以稍名

委人中士二人下士四人府二人史四人徒四十人

委烏
僞反

委人主斂芻薪以共
委積備行旅之用

士均上士二人中士四人下士八人府二人史四人胥四

人徒四十人

主均平地役蓋民屬民田之地
肥瘠廣狹不同均人使無偏暗

章人下士四人史二人徒十有二人

田地有草則荒蕪草人主治之蓋凡山林藪澤有可耕種之地皆除其草以待授民

稻人上士二人中士四人下士八人府二人史四人胥十人徒百人

稻人專主稻事蓋糾察民之稻田治否及公田所入之稻斂而入於賦

土訓中士二人下士四人史二人徒八人誦訓中士二人下士四人史二人徒八人

地利因時或有變易人工亦或今昔異宜土訓察土地之美惡下以訓民上以告王誦訓陳說古事亦下以訓民上以告王公劉疆里太王荒山後雖推以爲天下法而異宜異俗豈無損益此二職之所以設也

山虞每大山中士四人下士八人府二人史四人胥八人

徒八十人中山下士六人史二人胥六人徒六十人小山
下士二人史一人徒二十人林衡每大林麓下士十有二
人史四人胥十有二人徒百有二十人中林麓如中山之
虞小林麓如小山之虞

虞度也主山之大小險夷度其所生及適用之器物若
者可耕可樹若者宜取宜舍蓋必使其生不竭其用不
窮而非時採山入山者有禁此地利所以有餘財物所
以阜成也衡平也麓山足也林不盡在山材木所出亦
多官以治之如
立山虞之意

川衡每大川下士十有二人史四人胥十有二人徒百有
二十人中川下士六人史二人胥六人徒六十人小川下

士二人史一人徒二十人澤虞每大澤大藪中士四人下
士八人府二人史四人胥八人徒八十人中澤中藪如中
川之衡小澤小藪如小川之衡

川流水也川有通行旅與否者有主財物與否者別其
地察其奸均其利不特巡警而已故以衡爲名有水爲
澤無水爲藪其禁令均利亦如川衡而以虞名官者澤
物之利不時有必度其可否之宜也以上四職山虞林
衡相輔爲用或虞之衡之悉
求有益於民而無害於物

迹人中士四人下士八人史二人徒四十人井人中士二

人下士四人府二人史二人胥四人徒四十人

井音
礦

鄭康成曰迹之言迹知禽獸處井之言礦也金玉未成
器曰礦禽獸生於山林而無害於民則縱之耳惟田獵

習武祭祀不得不取故以述人掌之當取則有以知其
所在平居則民不得妄取金玉亦非民所宜常用以升
人掌之當用則取之民亦不得妄取此皆仁至義盡之事也

角人下士二人府一人徒八人羽人下士二人府一人徒
八人

角羽皆巾旒等禮物所需角人羽人
主之即細物亦有制不遺不擾也

掌葛下士二人府一人史一人胥二人徒二十人掌染草
下士二人府一人史二人徒八人掌炭下士二人史二人
徒二十人掌荼下士二人府一人史一人徒二十人掌蜃
下士二人府一人史一人徒八人

葛以爲絺紵染草藍蒨象斗之屬炭燬木所成茶茗也
以供祭祀蠶大蛤用於祭祀喪紀以上諸物項屑而不
可無主以官則
有制而不侵擾

閭人中士四人下士八人府二人胥八人徒八十人場人
每場下士二人府一人史一人徒二十人

圃若今之死場國之
場圃非農家者也

廩人下大夫二人上士四人中士八人下士十有六人府
八人史十有六人胥三十人徒三百人舍人上士二人中
士四人府二人史四人胥四人徒四十人倉人中士四人
下士八人府二人史四人胥四人徒四十人

藏米曰廩藏穀曰倉舍人則掌其
出人平宮中穀米多寡之政也

司祿中士四人下士八人府二人史四人徒四十人司稼
下士八人史四人徒四十人

司祿職闕而以祿名官必掌班米粟之
政者司稼則主巡稼事而徵斂穀者也

春人奄二人女春扠二人奚五人館人奄二人女館八人
奚四十人槩人奄八人女槩每奄二人奚五人

扠音由亦
音掄館尺

志反槩
苦浩反

扠扠曰也御案司屬職其奴男子入於罪隸女子入
於春槩則春槩二職女奚之外別有春槩之婦以共勞
役館人主炊之官槩讀
爲槩師之槩主坑食者

周官恆解卷二

地官司徒

雙流劉沅輯註

大司徒之職掌建邦之土地之圖與其人民之數以佐王安擾邦國

土地之圖若今郡國輿地圖 御案必知土地之宜人民之數然後可定民居制民產以安其身而教養之

以天下土地之圖周知九州之地域廣輪之數辨其山林川澤丘陵墳衍原隰之名物而辨其邦國都鄙之數制其畿疆而溝封之設其社稷之壇而樹之田主各以其野之所宜木遂以名其社與其野

地俞類反

周猶遍也東西爲廣南北爲輪積石曰山竹木曰林注
濱曰川水鍾曰澤土高曰丘大阜曰陵水崖曰墳下平
曰衍高平曰原下溼曰隰名物者十等之名與所生之
物邦國都鄙合外內而言畿疆由王畿以推及於天下
皆各有疆而溝以界之封土以記之社稷之壇亦由王
國推暨於天下社土神稷穀神壇壇外四面之埒田主
田祖之神土德生生其機在木卽木之異宜可知土宜
故樹木以表社名其社與野別爲之名非必以其木名
也之

以土會之灋辨五地之物生一曰山林其動物宜毛物其
植物宜阜物其民毛而方二曰川澤其動物宜鱗物其植
物宜膏物其民黑而津三曰丘陵其動物宜羽物其植物
宜覈物其民專而長四曰墳衍其動物宜介物其植物宜

莢物其民皙而瘠五曰原隰其動物宜羸物其植物宜叢
物其民豐肉而庠因此五物者民之常而施十有二教焉

會古外反阜音早音作藁藁音核專同團莢古協

反哲音錫羸力果反叢才東反肉如字庠音婢

會計也統計天下之土宜如下文所云天地生人五常

之性同而其氣質不同蓋風土爲之也故辨之而後因

俗制宜去其偏祛其蔽致民於中正之途五土大概乘

五行之氣從其多者論之然亦不可拘論也鄭康成曰

毛物貂狐貉貉之屬絳也阜物柞栗之屬鱗物魚

龍之屬藁蓮芡之屬有藁韜津潤也羽物翟雉之屬羸

物李梅之屬專園也介物龜鼈之屬水居陸生者莢物

薺莢王棘之屬皙白也瘠臞也叢物在藪之屬豐猶厚

也庫猶短也愚按物每因地而異人則靈於物者上言

五者不過言其大概而曰民之常者民無教則囿於其

地習於其俗而不知

變化反物於物矣

一曰以祀禮教敬則民不苟二曰以陽禮教讓則民不爭

三曰以陰禮教親則民不怨四曰以樂禮教和則民不乖

五曰以儀辨等則民不越六曰以俗教安則民不愉七曰

以刑教中則民不蹏八曰以誓教恤則民不怠九曰以度

教節則民知足十曰以世事教能則民不失職十有一曰

以賢制爵則民慎德十有二曰以庸制祿則民興功愉音

祀禮凡祭祀之禮敬其先則篤於孝養追慕敬神明則
知自束其身心故民不苟陽禮凡朝覲會同賓客周旋
之禮以其眾著故曰陽禮主於讓讓者必敬故民不爭
陰禮家人婦子日用事爲之禮以其任內修齊不必舉
知故曰陰禮恩義兼盡倫常浹洽故民不怨人情易於
偏戾以樂教之去其鷙陵之氣養其性情之和故民不

乖儀威儀度數尊卑貴賤等級明故民不越風俗異宜
因其俗而節文之以適於中民安而樂從之則不偷薄
造禮者刑之使歸於中正故民不暴亂誓久約之意惟
災救患誓久而不變故民不怠度制節之意各有其分
各安其制故民不妄想世事民生曰用所需之事凡功
業皆是因其能而教之以利用故民各有職以自効賢
有德者爵之尊卑視賢之大小則民勉於爲德庸功也
祿之厚薄視功之優絀故民興功凡此十二教因其俗
制其宜該許
多政教在內

以土宜之瀦辨十有二土之名物以相民宅而知其利害
以阜人民以蕃鳥獸以毓草木以任土事辨十有二壤之

物而知其種以教稼穡樹藝相息亮反

鄭康成曰十二土分野十二邦上繫十二次各有所宜
也相占視阜猶盛也蕃蕃息毓生也任謂就地所生因

民所能壞亦土也愚按以萬物自然吐露則言土以人耕種成熟則言壤春稼秋積樹木藝黍稷皆辨其宜而別其種始易收效也

以土均之澶辨五物九等制天下之地征以作民職以令地貢以斂財賦以均齊天下之政

均平也五物五土之物九等如禹貢所差征稅地有美惡必視其所出以制爲賦貢乃可均平

以土圭之灋測土深正日景以求地中口南則景短多暑日北則景長多寒日東則景夕多風日西則景朝多陰口至之景尺有五寸謂之地中天地之所合也四時之所交也風雨之所會也陰陽之所和也然則百物阜安乃建王

國焉制其畿方千里而封樹之

深試蔭反
景音影

天體渾圓地孕於天而其低昂形勢蔽日月而異風雨故萬國風景不同此但周公制洛邑爲東都言此以爲後世建國之法耳御案地中有二以形而言天包地如雞卵地中者乃天中也此惟赤道之下二分午中日表無影之中爲然以氣而言必陰陽五行中和會合乃可謂中二極之下晝夜極偏其地大暑中國當赤道北寒煖溫涼四序循環無常均其地大暑中國當赤道偏勝而洛邑又其中之中者以其得天地之中氣故謂地中天地之所合者地之中氣與天之中氣合也合故四時交而無多暑多寒之患風雨會而無多風之患陰陽和而無多陰之患於洛邑立一表於地上長八尺於夏至晝漏之半時用尺有五寸之士圭量表之日影若影與土圭等卽地中也如影短於土圭是地於日爲近南長於土圭地於日爲近北如偏東於土圭如日之將夕地於日爲近東偏西於土圭如日之將近西皆不得中然此乃當時建都洛邑時所爲聊示其

法之大概其實夫地間風土氣候有不盡然者勿泥視可也

凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者

四之一

土其地正其國都之方位也方五百里兼山林川澤間田附庸之地在內其實周制公侯皆方百里子男五十里其食者半亦據可耕之地稅賦言耳他放此

凡造都鄙制其地域而封溝之以其室數制之不易之地

晦一易之地家二百晦再易之地家三百晦

厥成曰都鄙王子弟公卿大夫采地城郭之宅曰室
共宰數制之謂制丘甸之屬王制凡居民量地以制
邑度地以居民地邑民居必參相得也鄭氏眾曰不易
之地歲種之地美故家百晦一易之地休一歲乃復種
地薄故家二百晦再易之地休二歲乃復種故家三百晦

乃分地職奠地守制地貢而頒職事焉以爲地澶而待政

令

此總承建國而下言之地職其地所當爲之職事地守
其地當守之禁令地貢其地當賦之額數分之定之制
之而後可頒其職事地澶因其地而制之法以待朝廷之政令

以荒政十有二聚萬民一曰散利二曰薄征三曰緩刑四

曰弛力五曰舍禁六曰去幾七曰胥禮八曰殺哀九曰蕃
樂十曰多昏十有一曰索鬼神十有二曰除盜賊

人主修德承天養教備至民耕九餘三家有蓋藏陰陽
和而風雨時雖水旱不爲災萬一凶災饑饉又以荒政
十二濟之民遇災則易離散故曰聚也散利發府庫之
餘財及貸種等類薄征減租稅紓刑出輕罪緩死罪恐
有寬濫以此答天心也弛力息徭役舍禁凡有利之事
與民共之無禁去幾關市去其阻皆禮殺吉禮殺哀省
凶禮蕃樂蕃讀爲藩閉藏而不作多皆不備禮而娶使
各相依恤索鬼神徧告神祇以引咎凶年盜賊或乘時
攘竊除之
以安民

以保息六養萬民一曰慈幼二曰養老三曰振窮四曰恤
貧五曰寬疾六曰安富

鄭康成曰係息謂安之使蕃息慈幼如庶子三人與之
得二人與之餼十四以下不從政養老七十養於鄉五
十異糧之屬窮鰥寡孤獨者貧遭凶喪至匱乏無財業
者恤粟貸之寬疾不勞役之先王之世民皆有業而獨
有富者勤儉知計過人積而使然平其
徭役不過取以安之使得行周恤之事

以本俗六安萬民一曰媿宮室二曰族墳墓三曰聯兄弟

四曰聯師儒五曰聯朋友六曰同衣服

魏氏校曰本俗禮俗根本所在鄧康成曰媿善也約榘
文堅風雨攸除各有攸字族猶類也同者生相近死
相迫聯猶合也兄弟昏姻嫁娶師儒鄉里教以道藝者
同師曰朋同志曰友同衣服各以其貴賤而爲之服無
新異鄧氏元錫曰係息本俗與八統九兩其事相爲表
裏太宰執之爲民治司徒掌之爲民教皆所以約民於
道

正月之吉始和布教於邦國都鄙乃縣教象之灋於象魏使萬民觀教象挾日而斂之

正月之吉兼周正月朔日及正歲而言教象卽下文六德六行等事本舊章至此又懸其象使民熟觀洞曉十日乃收斂之

乃施教灋於邦國都鄙使之各以教其所治民令五家爲比使之相保五比爲閭使之相受四閭爲族使之相葬五族爲黨使之相救五黨爲州使之相賙五州爲鄉使之相

實比毗志反下同

使之謂立其長而教令使之五家爲比其居甚近非特同其休戚亦可察其音表敵使之相保閭二十五家受

居足以相容故使之相受受宅舍相寄託也族百家非
事力眾易舉故使之相葬黨五百家大忠難非百家可
禦故使黨相救州二千五百家水旱凶荒又非五百家
所能辦故使州相調五州萬二千五百家使相賓與其
賢能者王氏昭禹曰鄉遂之制始於五家之寡終於萬
有二千五百家之眾居雖異而輯睦若一家人雖眾而
和台若一心司徒擾之則相爲
仁讓司馬用之則相爲憂患焉

頒職事十有二於邦國都鄙使以登萬民一曰稼穡二曰
樹藝三曰作材四曰阜蕃五曰飭材六曰通財七曰化材
八曰斂材九曰生材十曰學藝十有一曰世事十有二曰
服事

職事民所職之事登者載之於籍也稼穡卽三農生九
穀樹藝卽園圃毓草木作材卽虞衡作山澤之材阜蕃

卽數牧養蕃鳥獸飭材卽百工飭化人材通財卽商賈
阜通貨財化財卽嬾婦化治絲枲斂材卽臣妾聚斂疏
材生材卽開民轉移執事太宰主之而司徒頒之學藝
講習道藝世事巫醫卜筮之屬世守其事者與前世事
教能不同服役公家之事若府史胥徒庶人在官者
冢宰治國用以九職任民財賦所從出也司徒頒教則
又有三者
不可缺也

以鄉三物教萬民而賓興之一曰六德知仁聖義忠和二

曰六行孝友睦婣任恤三曰六藝禮樂射御書數

知音智
行下子

反婣

音因

物猶事也曰鄉者德行道藝必成於家而先著於鄉然
後以漸達朝廷也興猶舉也賓興鄉大夫以飲酒之禮
賓客之定其賢者然後獻其書於王德行藝相爲表裏
者也第人材質學業不能一致則所造不同故分爲三

三者之中又分爲六苟其有一得者皆不遺焉若全
備之則聖賢之徒其任以大位明矣知明於理仁慈於
物聖內外明通義裁制得宜忠不欺和不戾六德必由
誠意正心修身而得之於身以爲德分之則有六合之
乃爲賢別其名使人以是課德也非但有一端之謂六
行本六德而出者則爲大醇其質之美學之偏而各具
一端者亦有焉善事父母爲孝善待兄弟爲友睦親於
九族嫺親於外親任信於友而可倚任恤振濟貧者禮
樂有全體大用此但以其儀文而言則禮樂五禮六樂
之儀節也射五射之法御五御之節書六書之品數九
數之計詳見保氏朱子曰先王之世教民而賓與之法
如此雖欲人才不成風俗不厚蓋亦不可得矣正使士
之賢者或不免於外慕有司之不明者或不足以得人
然其所以相末者蓋猶出修身謹行之意一得其人則
其法固萬世不易之良法也愚按君相以此教人必先
以此修己己德修而後教令行若但以此法取人而上
之人無以作之率其弊轉
滋故修身爲治世之本也

以鄉八刑糾萬民一曰不孝之刑二曰不睦之刑三曰不
嫺之刑四曰不弟之刑五曰不任之刑六曰不恤之刑七
曰造言之刑八曰亂民之刑

刑亦言鄉者是非之公由鄉而起也糾察也賈氏公彦
曰惟六行設刑者德藝在身行乃施之於人者恐有愆
負故刑以防之鄭康成曰造言訛
言惑眾亂民執左道以亂政也

以五禮防萬民之僞而教之中以六樂防萬民之情而教
之和

此乃總結上文以明司徒之教不外乎中和教之之要
不外乎禮樂也五禮吉凶軍賓嘉六樂雲門咸池大韶
大夏大籥大武有偏私則不中有暴戾則不和以禮樂
節文其性情而涵養其中和內有存養省察之功外有

敬慎威儀之道此上文一切
教法所以皆禮樂之事也

凡萬民之不服教而有獄訟者與有地治者聽而斷之其

附於刑者歸于士

斷丁
亂反

不服教不遵行禮樂訟相爭辯獄則致人於法也與猶
投也有吏治者六鄉六遂及公邑都鄙之吏聽斷聽而
治其是非士司寇士師之屬言此明
司徒專務敷教禮樂爲清刑之原也

祀五帝奉牛牲羞其肆享先王亦如之大賓客令野修道

委積大喪帥六卿之眾庶屬其六引而治其政令大軍旅

大田役以旗致萬民而治其徒庶之政令

肆如字屬
之屋反

五帝分司五行以調四時祀之而司徒親奉牛牲進其
豚解之牲以薦腥進其體解之牲以薦熟教民敬也

大賓客令遺人修道具共委積教民禮讓也大喪大軍
旅田役教民忠也羞進也辟陳也豚解爲七體肱二股
二脊一脊二牛羊體解爲二十一而升於神俎者十有
一肱三曰肩臂膈股三曰髀膊髀脊三曰正脊展脊橫
脊脊三曰短脊正脊代脊合左右肱股脊并脊爲二十
一以神俎用右不用左且髀不升故十有一也大賓客
諸侯來朝六引引喪車索也在棺曰紼在道曰引帥眾
庶引柩使致其如喪考妣之誠以熊虎之旗致徒庶使
盡其効命同仇之志聽於司馬
則曰卒伍致於司徒則曰徒庶

若國有大故則致萬民于王門令無節者不行于天下大
荒大札則令邦國移民通財舍禁弛力薄征緩刑

大故王崩及寇兵也變起非常恐有奸細王門本有宿
衛此則致萬民守王門之外節六節無節者不得行防
姦也大荒大凶年大札大疫病也荒移民者避災札移
民者避地氣之惡有不可移者則通之財荒政十二此

獨舉其四者四者爲要
大司徒尤加之意也

歲終則令教官正治而致事正歲令於教官曰各共爾職
修乃事以聽王命其有不正則國有常刑

歲終周季冬正治致事正其所治之事而致之於上正
歲夏正月朔日則申令之爾乃皆汝也地官所掌者地
所司者徒故其所治皆土地人民之事而大要以教爲主以禮樂爲綱

小司徒之職掌建邦之教灋以稽國中及四郊都鄙之夫
家九比之數以辨其貴賤老幼廢疾凡征役之施舍與其
祭祀飲食喪紀之禁令

比必里反

賈氏公彥曰言建者非但副貳大司徒亦得專其事九
比如禹貢法以三等九則言之謂夫家高下有此九等

役謂徭役施當爲弛謂免其徭役夫家爲男女配耦者
弛舍則貴賤老幼單丁未娶女戶餘夫皆免之也禁令
祭祀以下皆有
禁令不使失禮

乃頒比瀆于六鄉之大夫使各登其鄉之眾寡六畜車輦
辨其物以歲時入其數以施政教行徵令及三年則大比

大比則受邦國之比要

畜許六反後六
畜皆同輦音璉

比瀆卽五家爲保至相闈相恤之瀆登載之於籍六畜
車輦或備國用或民自資辨其物之美數書其數以知
民之豐歉勤惰政教若鄉射讀瀆之類徵令軍旅田役
蓋養立而後教可行民富而後易使三年大比則受邦
國之比籍而
稽其得失

乃會萬民之卒伍而用之五人爲伍五伍爲兩四兩爲卒

五卒爲旅五旅爲師五師爲軍以起軍旅以作田役以比追胥以令貢賦

六軍之士出自六鄉必司徒平日教之有灋而後可用故云乃會卒伍而用之卽下文軍旅等也五家爲比家出一人在軍爲伍五比爲閭在軍五伍爲兩四閭爲族在軍四兩爲卒五族爲黨在軍五卒爲旅五黨爲州在軍五旅爲師五州爲鄉在軍五師爲軍無事則爲民有事則爲兵人相習誼相關服色形聲相識別此先王寓兵於農之良灋也鄭康成曰作爲也役功力之事追逐寇也胥伺捕盜賊也

乃均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人凡起徒役毋過家一人以其餘爲羨惟

田與追胥竭作凡用眾庶則掌其政教與其戒禁聽其辭
訟施其賞罰誅其犯命者凡國之大事致民大故致餘于
均平也周猶徧也一家受田百畝七口授以上田可役
者家三人六口授以中田可役者二家五人五口授以
下田可役者每家二人惟一人爲正卒其餘皆爲羨卒
不過役也若田取禽獸逐伺盜賊則其事不出鄉閭爲
時亦不久任民或多人爲之不限以制眾庶謂六鄉之
民政教軍旅田役皆有灋禁戒如偷惰欺慢等弊命上
之命誅以重刑責之之名大事戎事大故災寇餘
于卿大夫之子致民以備警致餘于以宿衛王宮

乃經土地而井牧其田野九夫爲井四井爲邑四邑爲丘
四丘爲甸四甸爲縣四縣爲都以任地事而令貢賦凡稅
斂之事

經經畫井井田牧不可爲井則以其地爲牧畜之地也
井邑丘甸縣都計其田數以定貢賦之灋貢貢其財用
賦出車徒給徭役稅
斂公田什一之灋

乃分地域而辨其守施其職而平其政

分地域凡建邦國道都鄙制鄉遂及山林川澤開田皆
各爲之界地不同守之者亦不同各有其職施之使盡
其職而無浸濫之弊
是所以平其政也

凡小祭祀奉牛牲羞其肆小賓客令野修道委積大軍旅
帥其眾庶小軍旅巡役治其政令大喪帥邦役治其政教

凡建邦國立其社稷正其畿疆之封凡民訟以地比正之

地訟以圖正之

肆如字委烏僞反積子賜反
帥音率比毗志反亦音皮

小祭祀天神風師雨師之屬地祇墳衍林澤之屬羞肆
見前小賓客諸侯之使臣令令遺人也帥帥而致於大
司徒巡役小力役則巡行之此皆謂六鄉之眾庶而已
喪役如正棺引窆之類立與正皆謂示以禮度不親往
也民訟爭是非以其比鄰察斷之
地訟爭疆界以邦國本圖核正之

歲終則攷其屬官之治成而誅賞令羣吏正要會而致事
正歲則帥其屬而觀教灋之象徇以木鐸曰不用灋者國
有常刑令羣吏憲禁令修灋糾職以待邦治及大比六鄉
四郊之吏平教治正政事攷夫屋及其眾寡六畜兵器以

待政令

會古外反
比必里反

屬官教官之屬羣吏則鄉遂公卿之吏及家稍縣都私
邑之吏屬於司徒者則攷其所治職事之狀而誅賞之

不屬於司徒者則令羣吏正其要會而致其事將以達於治官正歲帥其屬而觀象灋徇以木鐸矣又令羣吏皆懸禁令於其所治憲表懸也灋不修則廢墜職不糾則怠荒吏在鄉郊之內主民事者教治所主在教若十二教之屬政事所主在事若土地之政之屬夫三爲屋三爲井御案大司徒頒士農工賈之職定比閭族黨之制未言其所以楛而登之者若何也小司徒則遂頒比法以時入其數至三年而復受其要則凡九比之內其家之貧富民之賢否戶口之眾寡畜產器用之豐歉皆皤然於胸中而政教徵令施行於軍旅田役者斟酌調劑靡不詳盡矣

鄉師之職各掌其所治鄉之教而聽其治

賈氏公彥曰鄉師四人二人共主三鄉故言各掌聽其治者鄉大夫其於教則正歲頒之鄉使其於治則歲終令羣吏會政致事而已獄訟有所不服故聽之鄉師

以國比之澶以時稽其夫家眾寡辨其老幼貴賤廢疾馬牛之物辨其可任者與其施舍者掌其戒令糾禁聽其獄

訟

比必里反
施式氏反

國比卽前之九比受於小司徒者小司徒稽之辨之通國中及四郊都鄙而鄉師則各比其鄉項安世曰此所謂聽其治也然清其源以消欺罔之萌卽所以爲教

大役則帥民徒而至治其政令旣役則受州里之役要以

攷司空之辟以逆其役事凡邦事令作秩敘

辟音壁陸婢亦反

大役築作隄防城郭等至至役所而爲之部曲役要受役之民數辟法也營作司空之事而民數則登於司徒故考司空之法以鈎考民之役事詩曰乃召司空乃召司徒俾立率家卽其事也秩常也叙猶次也凡邦事則

不惟役事卽以役事言徵發之地有遠近番代之歲有凶豐皆有常次

大祭祀羞牛牲共茅菹

菹子都反一子餘反

牛與茅菹皆出於各鄉故鄉師羞共之而大司徒更羞之也

大軍旅會同正治其徒役與其輦輦戮其犯命者

輦九玉反輦里

演反音璉

徒役與輦輦自鄉具之故鄉師正治之而戮其不用命者馬駕以載輜重爲輦人輓之行以載任器爲輦

大喪用役則帥其民而至遂治之及葬執蠶以與匠師御

匱而治役及窆執斧以泣匠師

蠶枕報反一音毒匱音舊柩同窆彼驗反

治監督其事蠶羽葆幢也以指揮輓柩之役正其行列進退窆葬下棺也泣臨祝也匠師主豐碑之事斷大木

周官恆解

卷二 地官

七

爲碑前後兩傍各一用六練以千人分置繫之背碑負引下棺擊鼓以爲縱舍之節鄉師泣之執斧以爲威戒之飭

凡四時之田前期出田澶于州里簡其鼓鐸旗物兵器修其卒伍及期以司徒之大旗致眾庶而陳之以旗物辨鄉邑而治其政令刑禁巡其前後之屯而戮其犯命者斷其

爭禽之訟

斷丁亂反

四時田澶詳在大司馬先期出田澶於六鄉簡其器物恐有朽敝修其卒伍恐有不整大旗熊虎之旗大司徒在軍所建眾庶不特六鄉亦有公邑之民各以其所在名旗辨別之以免雜揉政令刑禁以防囂陵前後屯大司馬所謂前後有屯百步也始焉戒之有素使民無倉卒失事之咎終焉治之有灋使民無紛紜爭鬪之患此

所以寓講武之禮於田也

凡四時之徵令有常者以木鐸徇于市朝以歲時巡國及

野而闕萬民之難阨以王命施惠

難古艱字

有常每時舊禮徵令之事官之治所皆曰朝徇之使眾曉歲時隨時也難阨隨時皆有鄉師親邇隨時巡察之而以王命施惠然後奏報也

國及野包六鄉之內外言

歲終則攷六鄉之治以詔廢置

詔廢置告於司徒達於王與冢宰廢置之

正歲稽其鄉器比其吉凶一服間共祭器族共喪器黨共射器州共寶器鄉共吉凶禮樂之器若國大比則攷教察

辭稽器展事以詔誅賞

比必里反

鄉器下文諸器周雖以十月爲朔首而民事仍從夏正故於正歲稽鄉器吉凶之服與祭時等器官事則用官物非官事則用鄉物蓋先王之世習民於禮凡喪祭賓射吉凶之事皆別其器辨其禮器不具則禮不成故稽之使備豫合眾財以爲之而各量其所能具者具之使民耳聞目見熟習於禮樂之事是以民安其教而風俗淳也吉凶弔祭之服祭器簠簋鼎俎之屬喪器夷槃鞀軸之屬此三者出於民者也射器弓矢旌鼓侯布之屬寶器尊俎琴瑟之屬此皆出於公者也蓋公事之小者私家所爲公事之大者非私家所能辦又言鄉共者或有不給彼此移用相補則無廢事而禮可成六鄉之史各主其鄉之教至大比時書其教以達於上鄉師攷其所教之實與所書之辭相稱否稽器卽上文禮樂諸器既攷其吏之教辭矣又稽民間之器省視所行禮樂之事果實踐否而詔司徒與冢宰誅賞之蓋核實詳密如此

鄉大夫之職各掌其鄉之政教禁令

萬二千五百家爲鄉鄉大夫六鄉也以其分主六鄉之事故以其職名之爲鄉大夫用其體望以統六鄉而治民之事則州長黨正爲之鄉師各掌其所治鄉之教而聽其治遂大夫則兼聽治訟以無王朝之事也

正月之吉受教灋於司徒退而頒之於其鄉吏使各以教

其所治以攷其德行察其道藝

行下孟反

鄉東州長以下攷察互言之蓋各鄉之吏書其事以上而復細攷察之也

以歲時登其夫家之眾寡辨其可任者國中自七尺以及六十野自六尺以及六十有五皆征之其舍者國中貴者賢者能者服公事者老者疾者皆舍以歲時入其書

國中城郭中七尺年二十六尺年十五黃氏度曰不言
歲而言尺者歲雖登而身不及若姓短侏儒則舍之也
征之給公役國中服役者少而役事又多所以征宜遲
而舍宜早野之服役者多而役事又少所以征宜早而
舍宜遲舍者免役也賢能雖無職亦免役以勸服公
事胥徒庶人在官者之屬入其書入于大司徒也

三年則大比攷其德行道藝而興賢者能者鄉老及鄉大
夫帥其吏與其眾寡以禮禮賓之厥明鄉老及鄉大夫羣
吏獻賢能之書于王王拜受之登于天府內史貳之

比必里反

大比大考校也賢德行有道者能有藝者興猶舉也其
吏州長以下眾寡六鄉之中與於賓興之禮者或鄉多
或鄉寡故云眾寡也禮鄉飲酒之禮賓禮而賓客之厥
明賓興之明日天府掌祖廟之寶蕪者登於此亦賢如
寶也內史書副本
以待王爵祿之

退而以鄉射之禮五物詢眾庶一曰利二曰容三曰主皮
四曰和容五曰興舞

退畢事之名既資興賢能矣又常以鄉射禮求眾庶之賢者蓋非一時一次也射禮揖讓相先不爭故和容儀容修飭主皮期於必中和容既射勝者不矜負者不忿興舞節奏比於樂此五者所以觀德

此謂使民興賢出使長之使民興能人使治之

長知丈反

人之賢否惟鄉人知之甚詳上文鄉飲鄉射所以合鄉人爲之使民共舉其賢有德者出而入于成均升於司馬其有能者德未必賢還入於州黨爲主治之吏

歲終則令六鄉之吏皆會政致事正歲令羣吏攷灋于司

徒以退各憲之于其所治

會古外反

會計也計其教政之功狀致之於鄉大夫鄉大夫致於司徒正歲則令羣吏詣司徒以聽其政察政卽考歲終所致之政事也既攷其舊政又頒新政而各懸之於其所治

國大詢于眾庶則各帥其鄉之眾寡而致于朝國有大故則令民各守其間以待政令以旌節輔令財達之

鄭康成曰大詢詢國危詢國遷詢立君鄭氏眾曰所謂謀及庶民也朝外朝三槐九棘之所大故災變寇戎之等守其間以待靜鎮也以旌節輔令防姦也

州長各掌其州之教治政令之灋正月之吉各屬其州之民而讀灋以攷其德行道藝而勸之以糾其過惡而戒之若以歲時祭祀州社則屬其民而讀灋亦如之春秋以禮

會民而射于州序

長知丈反屬音燭行下孟反會如字

鄉大夫掌政教禁令然第執其總以率屬而已其禮則州長掌之屬猶合也讀瀆卽所掌之教瀆勸之戒之皆讀瀆時之事祭祀州社時亦讀瀆如前又于春秋二時以鄉飲酒之禮合其民而射于州序序州壘之名

凡州之大祭祀大喪皆蒞其事若國作民而師田行役之事則帥而致之掌其戒令與其賞罰

鄭康成曰大祭祀州社稷大喪鄉老鄉大夫於是卒者蒞臨也師征伐田田獵行巡狩役役作致之致之于司徒戒令賞罰未致於司徒則己專之既致於司徒則奉司徒命治之

歲終則會其州之政令正歲則讀教瀆如初三年大比則

大攷州里以贊鄉大夫廢興

會古外反

會計黨正以下政令文書以待攷課也賈氏公彥曰年
年攷訖至三年則大攷之言大者以有黜陟廢興也興
與賢能於朝廢
移郊移遂之類

黨正各掌其黨之政令教洎及四時之孟月吉日則屬民
而讀邦灋以糾戒之春秋祭禘亦如之國索鬼神而祭祀
則以禮屬民而飲酒於序以正齒位壹命齒於鄉里再命

齒於父族三命而不齒

崇崇
禁反

黨正奉州長之灋以施於其黨主乎禮教而言則曰教
法兼政令禁戒而言則曰邦灋黨正彌親於民故凡所
以導之善而禁之惡者尤切尤數故云糾戒之也崇崇
祭水旱之神亦爲厘位加祭祀稷索鬼神而祭祀歲十
二月蜡祭也禮鄉飲酒之禮正齒位鄉飲酒義所謂六
十者坐五十者立位六十者三豆七十者四豆八十者

五豆九十者六豆也一命天子之下士公侯伯之上士子男之上士再命天子之中士公侯伯之大夫子男之卿三命天子之上士公侯伯之卿不齒者別有專席非加於其上若族有七十者雖三命不致先愚按孝弟始於鄉里孔子於鄉黨恂恂如也將教民以尚齒而以貴傲族可乎蓋此謂族乃同姓五服之外者非伯叔父兄爵也貴貴所以尊君尚齒所以尊親貴貴與尊齒並行則既不使齒者失其尊亦不使貴者失其貴而未就席之前必有逸讓於父兄宗族之禮然後可以別就專席而坐但禮經亡缺不可考矣

凡其黨之祭祀喪紀昏冠飲酒教其禮事掌其戒禁凡作

民而師田行役則以其灋治其政事

冠古玩反

戒禁戒其必如禮而禁其不如禮也師田行役之灋皆素以教民至作民時卽以之治其政事師或黨正不爲之帥則第於作民時治之而已

歲終則會其黨政帥其吏而致事正歲屬民讀灋而書其

德行道藝以歲時涖校比及大比亦如之

會古外反
比必里反

黨政一黨之政吏族師以下之吏致事致所掌之事于
州長也六鄉之吏皆致事而惟黨正云然者州長掌教
土察吏之灋無事之可致而族師以下之事皆致於黨
正故黨正致於鄉大夫以上致於大司徒書記也黨正
與民近習知其賢否故書之以待州
攷至校比之事黨正第往涖之而已

族師各掌其族之戒令政事月吉則屬民而讀邦灋書其

孝弟睦姻有學者春秋祭酺亦如之

屬音燭
酺音步

六鄉之官無非掌教獨於族以師名者以一族僅百家
其於民甚近而易感率必其人可爲一族之師者乃有
以端其本也六德六行六藝皆邦灋也而獨書孝弟睦
姻者德行慈於身心不可以揭名孝弟睦姻驗諸事而

可指有學卽該六德六藝在內帥祭災害之神鬼族無鄉飲之禮因帥祭而合眾以酬獻亦讀邦邊

以邦比之灋帥四閭之吏以時屬民而校登其族之夫家眾寡辨其貴賤老幼廢疾可任者及其六畜車輦五家爲比十家爲聯五人爲伍十人爲聯四閭爲族八閭爲聯使之相保相受刑罰慶賞相及相共以受邦職以役國事以相葬埋若作民而帥田行役則合其卒伍簡其兵器以鼓鐸旗物帥而至掌其治令戒禁刑罰歲終則會政政事

比邦

必里反下毗志反會古外反

民之可任與否六畜車輦可用與否每閭時而異故以時屬民而校登之民之材力各有所任如可田可帥而

不可供雜役之類比之聯之總欲其相係固相投受以致其諧睦共勉於道藝有慶賞則其以爲榮有刑罰則其以爲辱無非相勉於善之意非一人有罪眾皆連坐之說也邦職國事同効其忠勤葬埋同致其憂恤帥而至帥之至於鄉師以致於司徒也致事致於黨正

閭胥各掌其閭之徵令以歲時各數其閭之眾寡辨其施舍凡春秋之祭祀役政喪紀之數聚眾庶旣比則讀灋書其敬敏任恤者凡事掌其比觸撻罰之事

數色土反比必里反觸古橫反

撻吐
違反

有所取曰徵有所使曰令閭胥所轄止二十五家連井同巷呵召甚易纖細周知故掌其徵令及數其人之眾寡祭禮役政喪紀卽上文州長黨正所掌諸事先須閭胥聚其人以應比謂聚集之後讀灋亦如上書敬敏任

恤者凡德行道藝未有不本於敬與敏者而任恤則仁
慈之意尤爲善之本故閭胥所書雖止此而異曰德行
道藝之選必由此而成也掌其比凡事皆攷其勤惰敬
肆觴罰酒以兕角爲爵撻扑也書曰朴作教刑御案
既舉祭祀役政喪紀而又曰凡事掌其比者上該軍旅
徵發下該民間相受相葬相救相賙及合耦與勸移民
稼穡之事

比長各掌其比之治五家相受相和親有孳奇衰則相及
徙於國中及郊則從而授之若徙於他則爲之旌節而行
之若無授無節則唯圖土內之

比毗志反舉本亦作
罪衰似嗟反內音納

比相親之義五家至少亦有長以帥之蓋即其中之賢
者爲之治灋亦司徒之灋也相受相容納相和親不乖
離奇反常衰不正相及相警察之徙國中及郊或出徙
於郊或自郊入國授授所在之吏以安置之此不出六

鄉者也若出六鄉而徙於他處則投之旌節以行若不
由比長安付及無節而出入者則爲逃亂之民內之國
土告上治之國土
圍牆居之如獄城

封人掌設王之社壝爲畿封而樹之凡封國設其社稷之
壝封其四疆造都邑之封域者亦如之令社稷之職

聚土曰封此封人專主畿內之封域而凡侯國亦有封
人矣社稷有壇外有壝言社以該稷言壝以該壇也王
國四面五百里各置畿限畿上皆爲溝塹其土在外而
爲封樹木以爲表封國造都邑皆然社稷之職有職事
於社稷者將祭之時封人
令之蓋修築灑掃之類

凡祭祀飾其牛牲設其楅衡置其絃其水臯歌舞牲及
毛炮之豚凡喪紀賓客軍旅大盟則飾其牛牲

楅音福絃本又作糾

持忍反豪古老
反炮薄交反

飾其牲飾以文繡福設於角衡設於鼻以防其觸也絃
著牛鼻之繩水以洗牲橐所以薦牲歌舞贊詠牛之肥
膈也薦毛炮時亦歌舞之炮燭去其毛而炮之與八珍
之毛炮異喪紀有奠牛賓客有牲牢軍旅有犒牛大盟
有載書之牛皆封人飾之也大盟者天子會同諸侯約誓之與春秋之盟不同

鼓人掌教六鼓四金之音聲以節聲樂以和軍旅以正田
役教爲鼓而辯其聲用以雷鼓鼓神祀以靈鼓鼓社祭以
路鼓鼓鬼享以鼗鼓鼓軍事以鞀鼓鼓役事以晉鼓鼓金
奏以金錡和鼓以金錡節鼓以金鏡止鼓以金鐸通鼓扶

云反鞀音羔錡音淳
錡直角反鏡女交反

六鼓四金見下文單出曰聲雜比曰音王朝祭祀賓客
之樂舞皆大司樂之屬教之此乃教民間祭祀師田等
事用之耳節之乃成音和則不干律正則各正其所爲
鼓擊鼓者也聲用各有所宜故辯之鄭康成曰神祀
天神社祭地元鬼享宗廟茲鼓大鼓也長八尺磬
鼓長丈二尺晉鼓長六尺六寸金奏謂樂作擊編鍾天
主乎陽雷乃陽氣之發越故曰雷鼓地主乎陰神之靈
者雖陰而未嘗不陽故曰靈鼓路大也人有道而不朽
乃享血食其道如路凡人皆可以行故曰路鼓大也
國之大事莫大於戎警緩也其聲亦緩以鼓役事恤民
之力樂作方進而未已故曰晉鼓錚錚于也圍如確頭
大上小下樂作鳴之與鼓相和軍事亦或用之錡錡也
以其聲濁謂之錡軍行鳴之以爲鼓節鏡如鈴無舌有
秉執而鳴之以止擊鼓進軍時擊鼓退軍時鳴鏡大
鈴也以金爲舌司馬振鐸軍將以下卽擊鼓故云通鼓
御案金鼓之節大司馬於四仲月之蒐狩教之矣此
鼓人掌之而屬於司徒者不肄之於平時則臨事
倉卒失措故使田野之民皆習之而知其節也

凡祭祀百物之神鼓兵舞敔舞者凡軍旅夜鼓警軍動則鼓其衆田役亦如之救日月則詔王鼓大喪則詔大僕鼓

敔音弗鑿七到反又

七歷反大僕音泰

兵千戚敔列五采繪爲之執之以舞祭百物之神六鄉中春祈秋報及蜡祭之類教鼓之者以澶鑿戒夜之鼓司馬灋昏鼓四通爲大鑿夜半三通爲晨戒旦明五通爲發响軍動臨陣之時詔王鼓救日月王必親擊鼓也大喪如崩及窆時詔大僕警衆使敬事

舞師掌教兵舞帥而舞山川之祭祀教敔舞帥而舞社稷之祭祀教羽舞帥而舞四方之祭祀教皇舞帥而舞旱暵之事凡野舞則皆教之凡小祭祀則不興舞

嘆呼侃反又可旣反

兵舞用干戚武舞也破舞五采繪爲之羽舞白羽爲之
皇舞五色羽爲之皆文舞也兵舞有捍衛之義破舞有
祓除之義羽舞有翳蔽之義皇舞有陰陽調劑之義野
舞非舞士而欲學舞者皆教之以待其闕舞以象功德
小祭祀不足以形容功德者則不舞與作也

牧人掌牧六牲而阜蕃其物以共祭祀之牲牲凡陽祀用
騂牲毛之陰祀用黝牲毛之望祀各以其方之色牲毛之
凡時祀之牲必用牲物凡外祭毀事用尢可也

黝音幽尢模江反

六牲牛馬羊豕雞犬牲體完具也阜盛也蕃息也多畜
之以待擇牛人羊人豕人犬人各以純毛之物供牧人
牧人又共與充人芻之三月以祭祀騂赤色黝黑色陽
祀祀天神陰祀祀地元人鬼毛之取純毛也周尚赤則
騂可概用之但不多得則陽祀陰祀望祀大概分類如
此故下文又言凡時祀之牲卽毛色難純亦必用牲物

至外祭如表貉及王行所過山川毀事或
禴除殃咎之事則用雜色之牲亦可矣

凡祭祀共其犧牲以授充人繫之凡牲不繫者共奉之

分言之則牛亦牲犧牲並言則犧牛而牲犬豕也充人繫而殊養之以致敬不繫者非時而祭祀則共奉之

牛人掌養國之公牛以待國之政令凡祭祀共其享牛求
牛以授職人而芻之凡賓客之事共其牢禮積膳之牛饗
食賓射共其膳羞之牛軍事共其犒牛喪事共其奠牛職

字積子賜反食音嗣犒苦報反

公猶官也待政令如下文所云享獻也獻神之牛求索也求牛備牛或損傷則索之於此牛中以用職人猶言有司牢禮殮饗也積所以給賓客之用饗者享大牢以飲賓食者亦享大牢以食皆於廟以速賓射謂大射及

與賓客射於朝天子諸侯射先行燕禮皆有殺俎故用
牛犒牛犒師之牛奠牛喪未葬以前奠無牲體唯祖奠
遣奠時
有牲體

凡會同軍旅行役共其兵車之牛與其牽傍以載公任器

凡祭祀共其牛牲之互與其盆簠以待事

傍薄浪反互音護簠音老

會同軍旅兼言行役王行巡守皆六軍從也兵車駕四馬之外別有兩較駕牛以載公家輜重亦謂之兵車牽傍有車重者駕轅而外又有居其前居其旁者互若今屠家懸肉格始解體未薦時懸於互待解訖乃薦之盆以盛血簠受肉之籠

充人掌繫祭祀之牲牲祀五帝則繫於牢芻之三月享先王亦如之凡散祭祀之牲繫於國門使養之展牲則告牲

碩牲則贊

受牛人牧人之牲而繫之牢閑也防其觸齒之故養牛
羊曰芻散祭祀司中司命山川之屬國門城門司門之
官使守門者養之蓋爲時不久卽當用之者展牲祭前
夕視牲之時告以體全無傷碩牲牲肥大者力猛防觸
齧則助持其紉

載師掌任土之灋以物地事授地職而待其政令

載事也掌任土之事土德厚載因爲名任土見下文
物物色之以知其土宜授地職授鄉遂公邑之吏家稱
縣都之長也待政令待賦稅之令

以廬里任國中之地以場圃任園地以宅田士田賈田任
近郊之地以官田牛田賞田牧田任遠郊之地以公邑之

田任甸地以家邑之田任稍地以小都之田任縣地以大

都之田任疆地

賈音古疆
居良反

廛市城中空地里居也場圃附郭宅畔之餘地在農田之外者宅田所謂二畝半在邑之田也士田其先人有功德而子爲士者賈田賈人所受按周制民皆受田百畝而世族之子或賈人之子或不習耕作故又有田以給之近郊遠郊就王畿言之而侯國亦視此矣官田大夫士有故而去三年不收其田里之田牛田牧田牛人牧人所受之田賞田國君賞賜之田公邑之田六遂餘地家邑之田大夫采邑小都卿之采邑大都公及王親子弟之采邑二百里曰甸三百里曰稍四百里曰縣五百里曰疆任者地之形勢不同受田邑者遠近不得盡如制其所生育賦貢取正於是也

凡任地國宅無征園廛二十而一近郊十一遠郊二十而

三旬稍縣都皆無過十二惟其漆林之征二十而五

漆本又作

七
漆音

此言任地之灋無取橫征也貢賦之灋以什爲準有地
治之吏徵之外如國中之宅無征園屋間有征者不過
二十而一耳近郊之園屋取用時多十分取一遠郊及
甸稍縣都聽民利之去國益遠則取用時少或近郊不
足而取之遠地則不過二十而三且無過十二也惟漆
林需漆之事頗多而民用時少其利又出於自然不出
人工則二十而五也前人以近郊數旬爲征稅誤

凡宅不毛者有里布凡田不耕者出屋粟凡民無職事者
出夫家之征以時徵其賦

宅不毛不樹桑麻也里謂所居之宅也有宅而不毛罰
令出里布布泉也有田而不耕罰令出屋粟夫婦具而

周官恆解

卷二 地官

表

不勤職業罰令出一夫力役之征皆所以警
游惰也徵其賦卽三者之征非謂田賦也

閭師掌國中及四郊之人民六畜之數以任其力以待其

政令以時徵其賦

畜許六反下同

六畜或贖農事或備車徒或備養老閭師掌之任其力
不廢其能不強其所不能也政令司徒之政令徵其賦
斂之而各歸於所司如九穀入於廩人布帛入於典婦
功貨物入於玉府內府鳥獸入於膳夫庖人器物入於
冬官
之類

凡任民任農以耕事貢九穀任圃以樹事貢草木任功以
飭材事貢器物任商以市事貢貨賄任牧以畜事貢鳥獸
任嬪以女事貢布帛任衡以山事貢其物任虞以澤事貢

其物

申上文任民力之事蓋問師於民最近任民以農圃等事使之勤職業而備貢賦或常用或不常用預儲之非問師時徵而貢之也

凡無職者出夫布凡庶民不畜者祭無牲不耕者祭無盛

不樹者無椁不蠶者不帛不績者不衰

衰七同反

此亦警游情之事也無職者所謂閒民無常職轉移職事者無常職者以轉移職事為職而或不受轉移之職則罰令出一夫之布不畜以下五事亦因其所曠之職而即罰以難供之物使之不能備禮蓋大司徒以禮樂興民民不能備禮即無由得與罰之而民始勤不然安於惰廢禮教墮矣

縣師掌邦國都鄙稍甸郊里之地域而辨其夫家人民田

萊之數及其六畜車輦之稽三年大比則以攷羣吏而以

詔廢置

比毗志反
後放此

王國百里之外爲六遂又其外爲小都大都尙有餘地
才封人者則爲公邑天子使吏治之其地名曰縣其官
名曰師縣師專主公邑之地但公邑外連邦國家稍內
連郊里其間有犬牙相錯之公邑故通邦國郊里與甸
之地域言之夫家成戶者也民人兼及餘口也萊休不
耕者辨稽者掌其圖籍及大比則以攷家稍縣都之羣
吏而詔司
徒廢置

若將有軍旅會同田役之戒則受灑於司馬以作其眾庶
及馬牛車輦會其車人之卒伍使皆備旗鼓兵器以帥而

至

受濟於司馬者如用眾庶若干馬牛車輦旗鼓兵器若干也帥而至至於司馬至則各有將帥率之矣

凡造都邑量其地辨其物而制其域以歲時徵野之賦貢

量音良

都大都小都邑家邑量其地大都百里小都五十里家邑二十五里皆度其山川原隰夷險多寡之數而後建置之物其地所出之物辨之而後可以宜民域界也野卽都家之地以歲時徵其賦貢而入於其長

遣人掌邦之委積以待施惠鄉里之委積以恤民之難阨

門關之委積以養老孤郊里之委積以待賓客野鄙之委

積以待羈旅縣都之委積以待凶荒

遺欲季反積子賜反施式政反

羈吉
滄反

遺饋也少曰委多曰積待者待鄉師司救司稼之屬以王命施之民卽鄉里之民雖同居此鄉里而忽有喪疾困厄者卽以其地委積恤之門關委積以老孤之人或在外不得入在內不得出則以養之郊里遠郊之里賓客至卽與之廩餼野鄙更遠矣羈旅留滯而不能行者以此待之縣四百里都五百里凶荒則所需更多縣都之委積亦多

以此待之

凡賓客會同師役擊其道路之委積凡國野之道十里有廡廡有飲食三十里有宿宿有路室路室有委五十里有市市有候館候館有積凡委積之事巡而比之以時頒之

此必
里反

此申上文未盡之意凡賓客會同師役遣人皆掌其委積而委積之所則如國野之道十里有廡暫憇之所備

飲食三十里有宿止宿之所備人畜之用五十里有市
市有候館可多憩息且市之貨物可備增益其所不足
也凡委積之事其地不一如上文所
云遣人則時巡而考校之且頒其乏

均人掌均地政均地守均地職均人民牛馬車輦之力政

政如
字

均人凡畿內鄉遂及公邑皆有之蓋創以其地之人爲
之地政兼下三者而言地守山川要隘原隰有守之者
情勢繁簡勞逸不同地職所承職事有常職有隨時徵
令之職皆均之使平師役用人民牛馬車輦亦均之使
無偏枯鄭氏以政爲征不知經意本以爲
用民之力皆政所宜然非苛求於民也

凡均力政以歲上下豐年則公旬用三日焉中年則公旬
用二日焉無年則公旬用一日焉凶札則無力政無財賦

不收地守地職不均地政三年大比則大均

此必里反

申言均力政之事以用民力尤上之所重也公旬公家當直之日公家不能不需民力而必視其年之豐殺以爲節若凶札則民困矣故不用其力不用其財賦地守地職有常稅者亦不收之卽尋常所均地政亦從其畧以凶札則民困必不能均也大均者總計三年中地守地職地政果悉均否也

師氏掌以媿詔王以三德教國子一曰至德以爲道本二

曰敏德以爲行本三曰孝德以知逆惡教三行一曰孝行

以親父母二曰友行以尊賢良三曰順行以事師長居虎

門之左司王朝掌國中失之事以教國子弟凡國之貴遊

子弟學焉

媿與美同行下孟反

師氏賢有德行者以徽詔王凡一切善事隨時詔王無
定名也理具於心曰德見諸行事曰行三德二行撮其
要言之國子王太子王子公卿大夫元士之適子皆是
至德存心養性事天立命之學道則統萬事萬物之理
而言萬事皆本於心而心有入心道心滌盡人心純乎
道心則性全矣由是而措諸萬事無不宜故曰至德以
爲道本也德非易成必有勤敏之志然後能深造自得
可實見諸事爲故曰以爲行本也德兼萬善而孝爲本
根仁敬之念於此篤實深造則凡一念之動逆於理而
流爲惡者皆毫髮不能自欺故知逆惡此三者皆蘊於
中而獨自知者故爲德也三行卽本是而見諸行事孝
行不獨有其心而必實踐其事盡誠盡敬盡禮莫非所
以親愛父母也友愛也凡賢良之人則愛而敬之乃能
集眾善而益身心順順於禮也既奉爲師長卽當順受
訓教勉爲聖賢此三者皆日用動靜間須臾不可離者
本三德以踐六行萬善由此而基矣虎門路寢門也畫
虎以明猛守之意王視朝於此則師氏居焉蓋王以師
氏教國子而亦自檢其身心使師氏居此以糾己愆故

曰司王朝國中失之事先朝及現在不合之事教國子弟使知戒懲蓋理必驗諸於事知失卽知得而異日然後可以施諸於事以上師氏所教蓋成人入大學者

凡祭祀賓客會同喪紀軍旅王舉則從聽治亦如之使其屬帥四夷之隸各以其兵服守王之門外且蹕朝在野外

則守內列

從如字蹕音畢

舉舉其禮從之以便救其失禮王所在皆有朝以聽治亦從之也四夷之隸恐不習於禮故師氏之屬帥之令各以其地之兵與服守王門外屬上士二人府史胥徒之等蹕四夷之隸禁止行人勿迫王宮非師氏蹕也內列蕃營之在內者守帥四夷之隸守之

保氏掌諫王惡而養國子以道乃教之六藝一曰五禮二

曰六樂三曰五射四曰五馭五曰六書六曰九數乃教之
六儀一曰祭祀之容二曰賓客之容三曰朝廷之容四曰
喪紀之容五曰軍旅之容六曰車馬之容

諫者以禮義正之反乎媿即爲惡師氏詔媿而保氏諫
惡互相成也道卽上德行之事下言六藝六儀道之緒
餘也然習爲其事則莊敬和樂之心日熟有不覺日進
於道而不知矣故曰養鄒康成曰五禮吉凶軍賓嘉六
樂雲門大咸大韶大夏大濩大武也鄭氏眾曰五射白
矢參連剡注襄尺井儀也五馭鳴和鸞逐水曲過君表
舞交衢逐禽左也六書象形會意轉注處事假借諧聲
也九數一方田以御田疇界域二粟米以御質劑變易
三差分以御貴賤廩稅四少廣以御積羈方圓五商功
以御功程積實六均輸以御遠近勞費七方程以御錯
絲正負八贏不足以御隱雜互見九句股以御高深廣
達六儀惟喪紀主於哀餘皆以敬爲主而誠與讓隨時

協宜先儒鑿
鑿求之轉隘

凡祭祀賓客會同喪紀軍旅王舉則從聽治亦如之使其
屬守王闡

從王亦與師氏同而守王闡特異御案師氏胥十有
二人徒百有二十人倍於保氏以王門外守者眾多用
四夷之隸故多其徒董之保氏
守宮中之闡則第用其半足矣

司諫掌糾萬民之德而勸之朋友正其行而強之道藝巡
問而觀察之以時書其德行道藝辨其能而可任於國事
者以攷鄉里之治以詔廢置以行赦宥

行下孟反強如字
行赦宥行如字

糾矯而正之之辭萬民之德自州長以及族師無時不
以德行教民矣而又有司諫司救時巡而糾正之朋同

道相聚友則親愛之名勸之朋以博採眾長勸之友以
親賢近仁或有不正者則正之使強於道藝巡問巡訪
觀察細爲考驗以時書其德行道藝辨其能者以此攷
鄉里之治詔廢置詔鄉師若遂師也救宥改過自新者
宥之古者鄉舉里選自閭師以達於州長鄉大夫而司
諫又時巡察之如此故賢否無出混淆積行無不上達
也

司救掌萬民之衰惡過失而誅讓之以禮防禁而救之凡
民之有衰惡者三讓而罰三罰而士加明刑恥諸嘉石役
諸司空其有過失者三讓而罰三罰而歸於圜土凡歲時
有天患民病則以節巡國中及郊野而以王命施惠

衰邪同

衰悖於正惡反乎善過失無心之誤誅讓皆責也而誅
重於讓以禮防禁申明禮義使其父兄師保及有司防

禁之議責教之至於三而不改則加之罰三罰而猶不
梭則歸諸士加以明刑明刑鞭朴之類眾所共見也故
曰明嘉石朝士所掌書其衷惡於石以恥辱之雖曰恥
之亦望其改過從善也故名曰嘉石役諸司空役以官
府力作之事過失本出無心然三讓而不改則必罰三
罰而不悛則歸於圍土圍禁之使速改加明刑歸圍土
皆司寇之事此特究竟言之天患哉害也節旌節施
惠期恤之既懲其過亦恤其災此所以爲司救也

調人掌司萬民之難而諧和之凡過而殺傷人者以民成

之鳥獸亦如之

難乃且反下同

鄭康成曰難相與爲仇讎諧猶調也過非本意也成平
也殺傷人未死者也以民成合鄉民以其議其償而平
其事鳥獸過失殺傷人之命
產亦眾議償其值而平其事

凡和難父之讎辟諸海外兄弟之讎辟諸千里之外從父

兄弟之讎不同國君之讎
抵父師長之讎
抵兄弟主友之

讎
抵從父兄弟弗辟則與之
瑞節而以執之

辟音避從才用反

此所謂讎皆過失殺傷者也過失殺傷讎所可宥而其子弟之心則不以爲可忘也必常思報復之聖人開人
民自新之路而又未嘗不伸人子孝弟之情故有此和
難之濼使其所讎者遠避之君大夫士其家臣以爲君
主友至友而已所依以爲主者若其人堅執亡意必思
復讎而弗避則亂民矣調人與避者以瑞節如其來讎
則執之以歸於官然古人用濼至平毫髮無失然後此
濼可行至於殺人至死則必以官濼治之而死者不至
含冤生者亦無從尙思復讎矣
前人於此多誤蓋由未達經意

凡殺人有反殺者使邦國交讎之凡殺人而義者不同國

令勿讎讎之則死

反復也殺其人復殺其子弟恐與己爲讎此至凶殘者也必寬之於瀕其或逃匿則使邦國交讎之羣捕之也殺人而義者其所殺之人罪本應死而有司未及察之既爲讎者所殺是有司不明而殺者有可原之罪矣則引咎自責台其人與讎殺者異國而居使勿再讎蓋罪已平而怨可釋矣若更相讎則殺之以止亂夫殺人者死天下之公義也然有可死之罪而官不及治之其子弟挾天性之憤以殺之其必已鳴於官而官不治或阻於徒隸而不得上達然後其寃不伸憤而讎殺爲上者宜審其所讎之由及有司之罪而平之此謂人所以特設之故也後世議復讎者多欠分明不可不察

凡有鬪怒者成之不可成者則書之先動者誅之

鬪怒辯訟也成平也平之使息爭有不可成者書其姓名及其事於版若有先動爲鬪訟者則誅之夫鬪怒而平之必其本可平者也而有不可成者是梗化之民也何以不速誅而書之蓋恐其怒未卽平寬以俟之久而

不解則誠不可不誅矣
此仁義兼盡之道也

媒氏掌萬民之判凡男女自成名以上皆書年月日名焉

令男三十而娶女二十而嫁

上市
養反

判半也男女兩家各有願欲媒氏必先就各家盡其情而審其毫無乖異然後合之也成名子生三月父名之後以其年月日及名達媒氏男子三十女子二十始壯而後娶嫁使民養其血氣而壽也

凡娶判妻入子者皆書之

御案判妻謂出婦入子以他人之子爲子娶妻也判妻必有不得已之故書其事以俟其悔過復合入子以承宗祧與己自生子同故亦書之

中春之月令會男女於是時也奔者不禁若無故而不用

合者罰之司男女之無夫家者而會之

中音仲會如字

會合也會男女即媾娶男女也古昏嫁必中春以應中和之天氣前人誤以爲期會之會奔六禮不備也是時有貧而不能具禮者聽其適時不禁責之若非貧困有故而托於此以婚嫁則罰司男女之無夫家者而會之正解奔之義也無夫家男女無親族可依者

凡嫁子娶妻入幣純帛無過五兩禁遷葬者與嫁殤者

純如

字

入幣納幣純衣絲衣而緇者也五兩十端也古者制幣丈八尺此則每端以二丈整數爲之兩端相向卷之共爲一兩蓋庶人納幣之數也詳於禮而儉於物所以爲中道鄭康成曰遷葬生非夫婦死既葬遷之使相從也殤十九以下生不以禮相接死而合之是亦亂人倫也

凡男女之陰訟聽之於勝國之社其附於刑者歸之於士

鄭康成曰陰訟爭中冓之事以獨遠者勝國亡國也云國之社奄其上而棧其下使無所通聽其訟於此不欲宣露之也罪不可赦宥者歸於士以刑之士司寇之屬赦宥者媒氏聽之

司市掌市之治教政刑量度禁令以次敘分地而經市以陳肆辨物而平市以政令禁物靡而均市以商賈阜貨而行布以量度成賈而徵債以質劑結信而止訟以賈民禁偽而除詐以刑罰禁誑而去盜以泉府同貨而斂賕

賈價同債

音育劑津私反商賈賈民賈音古

賕薄報反去起呂反除傷蛇反

鄉遂公邑稍縣都皆有市此司市國中司其餘皆視此矣治之使不亂教之使不爭正之使不欺刑其盜

賊姦僞者量以五量定穀米之平度以五度定布帛之制禁之使勿爲命之使爲入者其大經也次吏所治舍肆行列也司市之次居中每二十肆則爲胥師賈師之次內宰所謂設其次也其餘邸肆各有行列內宰所謂置其敘也次敘定而後市中之事有統緒而不亂陳列也辨物物異肆物同列於一區則美惡相校易辨而市價自平靡侈靡尙侈靡則質樸者反賤故禁之而云均市阜盛也商通而賈居積取之不價曰阜流通不滯則行同量度者朝廷之制準以成賈買者自多如徵召之也質劑兩書一札而別之結其誠信以止爭訟賈民胥師賈師之屬皆就其地通曉物價者爲之僞詐乃可禁除誣強暴盜攘竊也同其也民貨不售則爲敘而買之民無貨則除賈而與之以備不給

大市日廛而市百族爲主朝市朝時而市商賈爲主夕市夕時而市販夫販婦爲主凡市入則胥執鞭度守門市之

羣吏平肆展成奠賈上旌於思次以令市市師蒞焉而聽
大治大訟胥師賈師蒞於介次而聽小治小訟凡萬民之
期於市者辟布者量度者刑戮者各於其地之敘凡得貨
賄六畜者亦如之三日而舉之

廛音側又作昃上時
舉反思作司辟擊同

大市以百物交易之所日廛午後也百族卽百物之主
以類相聚故曰百族物眾人亦眾遠近畢至故日廛而
市朝市商賈所居積崇朝可得夕市販夫販婦所求朝
夕需用之物此大概別言之市入民入市者也胥守關
以防姦詐執鞭以威眾執度以正度也羣吏胥師以下
平肆平其行列展布也奠定也展布其所成之貨物定
其貨物之價值上旌懸旌也思次若今市亭懸旌以令
眾使遵平市之令市師蒞焉民覩旌而知有官志乃戢
也治訟之大者市師聽之小者胥師賈師聽之別尊卑
介次副舍期約也辟布壁而買之蓋民別有需用不必

爲衣者言辟布而凡買布者視此矣各於其地之叙而後不滄雜得得遺物也亦如之各置於其地以待其主之求三日無來求者則官舉其物而登記之使踰時而求者皆可得

凡治市之貨賄六畜珍異亡者使有利者使阜害者使亡靡者使微凡通貨賄以璽節出入之國凶荒札喪則市無

征而作布

無音

亡乏缺利利賴害害俗靡侈靡益民之物必使有而且盛害俗之物必使亡而且微所以備財用而厚風俗也貨賄有餘而出不足而入皆以璽節付之御案征即屢人賦之屢布也無征即所謂法而不厚也無征以恤商作布以平賈自是兩事鄭康成曰爲民困乏故不征金銅無凶年因物貴大鑄泉以饒民呂祖謙曰農桑衣食財貨之本錢布流行權一時之宜而已三代之前用錢幣者甚少漢武帝有事四夷立告緡之漢以括責天

下自是而錢始
重古意失矣

凡市僞飾之禁在民者十有二在商者十有二在賈者十
有二在工者十有二市刑小刑憲罰中刑徇罰大刑扑罰
其附於刑者歸於士國君過市則刑人赦夫人過市罰一
幕世子過市罰一帑命夫過市罰一蓋命婦過市罰一帷
凡會同師役市司帥賈師而從治其市政掌其賣債之事

賈音

古

僞飾以假爲真鄭氏衆曰禁謂工不得作賈不得弼商
不得資民不得畜十有二十之中有二卽當防其漸禁
之也憲表其過徇示於衆朴撻也皆所以發其恥而使
之改過若不改則加以歸於士而治之市交利行刑之

所非君與貴者所宜干預卽一過而必有罰焉以防
利褻慢之漸也君不可罰則赦刑人刑人卽市人犯
徇朴之刑者若曰君爲施惠而來也幕布蓋唯皆障
之物若曰無以自蔽也尊貴非刑罰所加故以禮示
不敢斥言王故舉國君爲况會同師役皆須財用而
卽司市價買也賈師知物價司市帥之以從價既可平
亦治市政而免爭亂

質人掌成市之貨賄人民牛馬兵器珍異凡賣債者質劑
焉大市以質小市以劑掌稽市之書契同其度量壹其淳

制巡而考之犯禁者舉而罰之

質如字淳章純反

王氏應龍曰質之義爲平爲信物以取平人以取信也
成平也御案人民臣妾意盜賊之子女罪隸春秦之
外或以賜羣臣故士大夫家間亦有之記稱子碩請
庶弟之母又曰買妾不知其姓則卜之或士大夫家亦

有以所畜臣妾相易者，數質劑券也。長曰質，短曰劑。大小以其物之貴賤而別言。市之書契，則民人自相立券者也。稽之以察，知其情，預防其爭，淳當爲純，謂幅廣制謂匹長也。皆當如法舉書其所犯於冊，罰之又書之以戒再犯也。

凡治質劑者，國中一旬，郊二旬，野三旬，都三月，邦國，朞期。

內聽期外不聽。

市中爭訟，無非爲交易之事。因地遠近爲之限期。期內則治，期外則不治。以其事至細，且以杜民好訟且息文書也。

廛人掌斂市，布總布質布罰布廛布而入泉府。

欵音次本或作

次

款說文績所緝也總總領之名總布蓋布之佳者質布
 布成質而未加文飾者罰布犯市台者所罰之布麤布
 市邸所征之麤布皆謂布非錢也款布總布質布蓋購
 斂之罰布麤布則民應輸官者皆麤人經理斂之而入
 於泉府也前人沿鄭氏以布為
 錢又以為皆罰民所取悉誤

凡屠者斂其皮角筋骨入於玉府凡珍異之有滯者斂而
 入於膳府

皮角筋骨有中於國用者必就屠者而後求之即得斂
 之亦購而斂之非徒取諸民也珍異原非國之所貴第
 今既滯而不售久且廢壞故麤人亦購斂之而入於膳
 府蓋麤人皆各以其地之人為之故能悉知此等而以
 時購斂之以此與上條合參
 之而前人之誤解可識矣

胥師各掌其次之政令而平其貨賄憲刑禁焉察其詐偽

飾行儆惡者而誅罰之聽其小治小訟而斷之

懲惡示也胥師每肆一人刑禁市中之刑上文所謂禁御朴也詐偽飾以偽作真飾賤爲貴行儆惡民受其欺其偽得行也儆買也惡惡也見於事曰惡者謂其藏惡以導民也

賈師各掌其次之貨賄之治辨其物而均平之展其成而

奠其賈然後令市

賈音古

賈師肆各一人故云各掌其次之治賈師知物價故辨其物之良若使各有差等而得其平御案自賈人至司稽皆各有專治之事而不主於貨賄惟賈師治貨賄

凡天患禁貴儆者使有恆賈四時之珍異亦如之凡國之

賈積各帥其屬而嗣掌其月凡師役會同亦如之

賈音價

鄭康成曰恆常也若諸米穀棺木遇久雨疫病貴賣之
因災害阨民使之重困四時珍異如薦宗廟之物
案三代聖王所以恤民惠商之法曲備又穀物隨在皆
有故遇天患可禁貴債者後世救荒則以增價招商爲
善時勢各有宜也國家公用不時賣債者各次賈師更
代值月司其事以免匱乏師役會同市司亦帥賈師而
從也

司疏掌憲市之禁令禁其鬪鬪者與其疏亂者出入相陵
犯者以屬游飲食於市者若不可禁則搏而戮之

疏薄報反鬪許

反鬪

十肆設司疏憲表示貳胥師憲之也鬪以力爭鬪以口
爭疏亂不循公理者相陵犯欺侮侵越游游戲游飲食
非不可市非其地且以屬尤生亂也不可禁違犯
上行矣故執而戮之博執也戮或刑或衆辱之也

司稽掌巡市而察其犯禁者與其不物者而搏之掌執市之盜賊以徇且刑之

五肆設司稽佐司疏者貳司疏察之也不物異言異服及不如式之物盜竊盜賊惡匪徇徇於眾刑扑罰大罪則歸於士矣

胥各掌其所治之政執鞭度而巡其前掌其坐作出入之禁令襲其不正者凡有罪者撻戮而罰之

二肆胥一人又以貳司稽也司市已有執鞭度守門之胥此則執鞭度以巡市者前市前坐作出入應聽民自便而有禁令者防姦細偽詐乘人眾而亂市法不正者即其人也乘眾為姦掩其不備而執之又云凡有罪者察其不正而襲執之訊其果有罪則撻辱而罰之文相承也非二事也

肆長各掌其肆之政令陳其貨賄名相近者相遠也實相

近者相爾也而平正之斂其總布掌其戒禁

爾亦近也名相近而美惡貴賤不同則令相遠陳之勿混於美者實相近則同是美者令其相近而陳免混於惡者物之美惡別而市價乃平總布布之佳者以時購買之入于廛人以備官用

泉府掌以市之征布斂市之不售貨之滯於民用者以其

賈買之物楮而書之以待不時而買者買者各從其楮都

鄙從其主國人郊人從其有司然後予之

賈價同楮音竭抵作抵音帝

征布錢也官稅于民或以錢抵物存諸市以備用者不售之貨民滯而不行則如其所值之價買之物物爲楮書其賈以待民不時而買其賈也仍如原價不多取楮本也楊龜山曰斂其不售所以便商非利其賤而買之

待不時之買所以便民非以其貴而賣之主都鄙之大夫有司鄉遂之吏必其主與有司有符信然後予之者官收滯貨本以利民然商賈逐利而求買反售其欺無益於民也

凡賒者祭祀無過旬日喪紀無過三月凡民之貸者與其有司辨而授之以國服爲之息

賒贖也貸假也賒者暫用貸者久用民取官物古事不過旬日而償喪紀寬至三月各以其事之繁簡別爲限期也服事也國事猶言公事爲之息以當息也有司所在臨民之吏辨之恐其物不堪用民貸官物則辨其物而授之不苟付也以國服爲之息民償官物之候令服役官事若干日以此爲息此外不復取息蓋使民得盡其忠敬之誠亦不徒用官物是卽所以教也

凡國事之財用取具焉歲終則會其出入而納其餘會古

國事或上需用或民事當用者
皆取具於泉府會計也納入也

司門掌投管鍵以啟閉國門幾出入不物者正其貨賄凡
財物犯禁者舉之以其財養死政之老與其孤

管鑰也鍵閉也晨啟則投管昏閉則投鍵正貨賄正其
不如法者勿得入國門犯禁卽不正者也舉之罰之也
門關原有委積並此所罰之物並以養死國事者之父
母與其子鄭氏讀正爲征然孟子謂古之爲關也將以
禦暴則征商固
非聖王之制矣

祭祀之牛牲繫焉監門養之凡歲時之門受其餘凡四方

之賓客造焉則以告繫音計監吉衍
反造七到反

監門門徒也城隍多隙地牛牲繫焉易於牧養每門史
二人徒四人可有餘力祀五帝享先王之牲則不繫於

此以致嚴也餘祭門之餘每歲秋祭門九門礫廩與祭門所報之祭祭餘之牛牲聽其取受所以償其養牲之功也告告於王而止客以俟逆

司關掌國貨之節以聯門市司貨賄之出入者掌其治禁與其征塵

關王畿境內之關諸國亦視此國貨本國所出之貨貨賄則通指客貨而言節符璽也國貨自內而出則以節通之氓欺偽也聯門市貨由門出入而集於市司市司門咸有節以相證驗可知貨賄出入必由關司之者使流通勿居奇病民也治禁之事見下文征塵關有邸舍如市之塵商買居之則征其稅

凡貨不出于關者舉其貨罰其人凡所達貨賄者則以節傳出之國凶札則無關門之征猶幾凡四方之賓客敬關

則爲之告有外內之送令則以節傳出內之

傳張懋反敏音叩出內之

內音納

不出于關必有奇巧詐僞之弊故舉其貨而幾之去其奇巧僞飾者非盡沒入其貨也罰其人或罰以刑罰以布以節傳出之鄭康成曰商取貨民間無璽節者至關關爲之璽節及傳以出之其有璽節者亦爲之傳傳如今移過文書王氏昭禹曰節以達其物傳以書其數也凶年荒札疾疫關門之征皆謂虜征非征貨稅也猶幾猶幾察姦僞賓客朝聘者也敏關謂關人國語曰關尹以告行理以節逆之送令奉貢獻及文書以常事往來者

掌節掌守邦節而辨其用以輔王命守邦國者用玉節守都鄙者用角節

鄭康成曰邦節珍圭牙璋穀圭琥圭瑛圭也辨其用典
瑞所云珍圭以徵守也凶荒牙璋以起軍旅之類輔王
命王有命奉之以行執節以爲信守邦國通天子以下
而言 御案天子諸侯皆君道也故於其國中用玉節
而但有大小之差都鄙臣道也然其所泊必有節故用
角節以別之連氏曰用玉欲其比德用角欲其觸邪也
凡邦國之使節山國用虎節土國用人節澤國用龍節皆

金也以英蕩輔之門關用符節貨賄用璽節道路用旌節
皆有期以反節凡通達于天下者必有節以傳輔之無節

者有幾則不達

使所吏反蕩吐
黨反干氏作蕩

使節使人所執之信士平地也虎人龍各以其地之所
宜也皆鑄金象象之而以英蕩爲函輔之使不壞門關
司門司關也符以竹爲之璽以玉爲之旌析羽爲之有
期有限期事畢則反其節也又總結上意而言凡通達

於天下者必有節以傳輔之或有節或有傳皆可通達無則被幾不得達也云通達于天下則知符節以爲行遠之信若近境則無之不然足擾民矣

送人掌邦之野以土地之圖經田野造縣鄙形體之澮五家爲鄰五鄰爲里四里爲鄧五鄧爲鄙五鄙爲縣五縣爲遂皆有地域溝樹之使各掌其政令刑禁以歲時稽其人

民而授之田野簡其兵器教之稼穡

鄧作管反

遂人主六遂者郊外從二百里至五百里皆名野不曰遂而曰野者以造縣鄙形體等法通乎畿內又兼掌四等公邑卽六鄉之比閭族黨亦未著其城邑之形體於此遂人著之以見公邑稍縣帶皆同此法也 御案造城邑必因山川原隰之面勢規疆濼數牧之便宜度道路溝渠之支委故必以土地之圖經田野然後城野之

形體可定鄰里鄣鄙縣遂猶郊內比閭族黨州鄉也其
家數相同別其地而以溝樹識之各掌如五家則鄰長
五鄰則里宰也稽其人民亦各掌之授之田野若下文
夫一壠田百畝簡其兵器若鄣長旗鼓兵卒教之稼穡
古土與兵皆出於農
以力稼爲本業也

凡治野以下劑致阡以田里安阡以樂昏擾阡以土宜教

阡稼穡以興勸利阡以時器勸阡以彊予任阡阡莫亨反

又音忙樂音洛勸音助又
音組彊音陽反予余呂反

治野言凡者明自國中而外由鄉郊以達於畿皆同此
法也下放此阡民也無知之貌下劑下等之地致阡起
徒役也凡起徒役無論上地中地總以下等地爲率以
一爲正卒餘爲羨卒擾順也樂昏勸其昏姻如媒氏會
男女是室家定而人民樂業土宜十二壤之宜與勸使
相助共成其利時器未耜錢鏹之屬詩曰庠乃錢鏹

子有疆力者額外多予之田
以其能任事不負其能也

以土均平政辨其野之土上地中地下地以頒田里上地
夫一廛田百晦萊五十晦餘夫亦如之中地夫一廛田百
晦萊百晦餘夫亦如之下地夫一廛田百晦萊二百晦餘

夫亦如之

政如字

均地政量其地之美惡以授民下文申言之非謂征之
也上地中地下地以頒田里外此山林藪澤不與可知
上地易種多收故萊僅五十畝中地下地難種少收故萊
各加倍餘夫年已壯而無室家如鰥孤獨等亦各於其
地酌授以田與萊此不言授田若干則益子加謂餘夫
二十五畝者也授田廛以安之不失所廛民居也在
田在邑皆有之孟子
所謂五畝之宅也

凡治野夫間有遂遂上有徑十夫有溝溝上有畛百夫有

洫洫上有涂千夫有澮澮上有道萬夫有川川上有路以

達于畿

畛之引反亦音真
反涂同吾反澮古外反

遂溝洫澮皆所以通水於川也周家井地之澮通行天下然實止今北五省中原平曠之地耳其間引水灌溉不易得故遂人治溝洫等澮使田盡可耕而疆界正道里通鄭氏云遂廣深各二尺溝倍之洫倍溝澮廣二尋深二仞愚謂此亦大概因其淺深而異其名當各因其地勢水情爲之不可拘也徑容牛馬畛容大車涂容乘車道容二軌路容三軌亦然此五者皆於田外爲之至田間有畝畝廣深各一尺經不言及以畝在畝間不另占地也田十夫一井之地實則耕田止九夫匠人云方十里爲成卽此千夫之地方百里爲同卽此萬夫之地舉其成數言之故曰十千百里周公立灋言其大概如此而其實水道田畝因山川原隰地勢爲之不可刻

舟求劍第方百里而井井積而廣其灑
不外此耳必區區尺寸規限求之則非

以歲時登其夫家之眾寡及其六畜車輦辨其老幼廢疾
與其施舍者以頒職作事以令貢賦以令師田以起政役
若起野役則令各帥其所治之民而致以遂之大旗致之
其不用命者誅之

施式
氏反

登記於冊必歲時計之者闕歲則有增損也夫家猶男
女施舍免其役職則九職事九職之事政役不曰征而
曰政明役民必政之所當然而後可也起野役合一邑
而共爲其事令者令縣正以下各帥其民而至大旗即
鄉師所建司
徒之大旗

凡國祭祀其野牲令野職凡賓客令脩野道而委積大喪

帥六遂之役而致之掌其政令及葬帥而屬六綽及窆陳
役凡事致野役而師田作野民帥而至掌其政治禁令

屬首

燭綽音弗
窆彼驗反

御案祭祀蓋山川因國前哲令德之祭祀在野者野
共其牲其執事之人則遂人令之曰國祭祀者以別於
禁圃蜡社脩道路者守涂地之人而令之者野廬氏掌
委積者遺人遂人令之者臨時申令之耳致我役於司
徒遂人主六遂之事其民人皆有屬籍大喪則令稍人
帥以致於司徒其政令亦頒之即帥也掌也及葬以下
四句申明致及政令之事綽舉棺索在道曰引在棺曰
葬殯及啟朝時六鄉主其事載道及下窆時六遂主其
事陳役下棺時陳列其執役之人耳又言凡事致野役
以明遂人專主鄉以外之事去國益遠而遂人致其民
與近郊無異政治禁令
一同王制也作起也

遂師各掌其遂之政令戒禁以時登其夫家之眾寡六畜
車輦辨其施舍與其可任者經牧其田野辨其可食者周
知其數而任之以徵財征作役事則聽其治訟巡其稼穡
而移用其民以救其時事施式氏反

遂師猶六鄉之鄉師二人共主三遂彼言稽而此不言
稽者以有遂大夫稽之不言老幼貴賤廢疾與鄉師互
見爲義井牧田野小司徒已然遂師蓋分任之也辨其
可食者五穀之外有可資民食者皆令種之數田野與
民人數相當而後任之能盡其利也財田野所出據其
數以征之有常額役力作亦以其數役之有常期財征
役事人多規避故聽其治訟田土肥瘠不一耕穫異宜
雨暘氣候不齊事勢各有緩急移用其民以相助救

凡國祭祀審其誓戒其其野牲入野職野賦于玉府賓客

則巡其道脩旻其委積大喪使帥其屬以幄帟先道野役

及窆抱磨共丘籠及蜃車之役軍旅田獵平野民掌其禁

令比敘其事而賞凡匹爾反又作庇磨音浮亦音褒與培杼同籠魯孔反蜃市軫反

國祭祀祭祀之在野者審酌也誓戒掌於小宰遂師承

之以行於野之祭祀有不必用者故酌之共野牲遂人

於九職九賦者則徑入於玉府凡具也道路委積亦受

遂人之令而巡之庇之幄帟掌於幕人而在道將之以

先者遂師使其屬爲之道引導也野役喪在道之役事

抱引取也磨石也窆時掇取餘石共丘籠共爲丘之土

籠屨車喪車四輪迫地而行有似于蜃因取名焉以上

皆野役之事不正其行列部伍也比敘校比次叙御

案遂人辨上地中地下地之等而遂師則周知其數遂

人令貢賦而遂師徵財征遂人起征役而遂師作役事

遂人令師田而遂師掌軍旅田獵之政令一舉其綱一

詳其事也

遂大夫各掌其遂之政令以歲時稽其夫家之眾寡六畜

田野辨其可任者與其可施舍者以教稼穡以稽功事掌

其政令戒禁聽其治訟

施式氏反

遂大夫猶六鄉之有鄉大夫李氏嘉會曰遂師曰登遂大夫曰稽遂大夫稽之而後遂師登之朱氏申曰遂師言車輦此言田野蓋互見也功事農功九職之事遂師遂大夫皆遂官之長但遂大夫稽而辨之遂師乃登之畧不同也

令爲邑者歲終則會政致事正歲簡稼器脩稼政三歲大比則帥其吏而興吶明其有功者屬其地治者凡爲邑者

以四達戒其功事而誅賞廢興之

比必里反屬音燭

鄭康成曰不言其遂之吏而言爲邑蓋公邑之政令遂大夫亦施焉簡閭也稼器耒耜鎡基之屬稼政月令所云脩封疆審端徑遂善相邱陵阪險原隰土地所宜五穀所殖以教道民之類興猶舉也興卽舉民之賢者能者如六鄉屬猶聚也又舉吏治有功者屬而敕之以行賞罰四達猶言四境合四境以戒其功事考其得失而誅賞之也六遂之溝與六鄉畧同故其職互見而詳畧不同

縣正各掌其縣之政令徵比以頒田里以分職事掌其治訟趨其稼事而賞罰之若將用野民師田行役移執事則帥而至治其政令既役則稽功會事而誅賞

比必里反趨本又作趣音

促亦如字下並同會古外反

徵徵召比案比頒田里如夫一廛田百畝職事卽九職
之事稽功分考其功程會事合計其功事王氏應電曰
縣正猶鄉之州
長其事亦互見

鄙師各掌其鄙之政令祭祀凡作民則掌其戒令以時數
其眾庶而察其媿惡而誅賞歲終則會其鄙之政而致事

鄙師猶鄉之黨正祭祀祭禁也作民起役也數其眾庶
而察其媿惡以助大夫興暉也遂人以歲時稽其人民
遂師以時登其大夫之眾寡遂大夫以時稽其夫家之
眾寡稽者稽其數登者定諸籍以所治者眾也若鄙止
五百家故其民可得而數會者計一鄙之政
帥鄙長而下致事於縣正上下轉相承也

鄙長各掌其鄙之政令以時校登其夫家比其眾寡以治
其喪紀祭祀之事若作其民而用之則以旗鼓兵革帥而

至若歲時簡器與有司數之凡歲時之戒令皆聽之趨其

耕耨稽其女功趨音促

四里爲鄰猶鄉之四閭爲族其職事與族師互文見義
校數也枝登枝之而後可登之也喪紀與族師言葬埋
同祭祀不言何神蓋社稷之類遂鄉互見義也作民而
用之與族師作民而至同皆寓兵於農之義無事則爲
民之師有事則爲民之帥也聽之受而行之簡器兼稼
器兵器有司遂大夫所委屬吏女功絲枲之事鄒長彌
近民故稽之使震動恪恭於吏治而不敢慢其他蠶凌詬諄之事亦免矣

里宰掌比其邑之眾寡與其六畜兵器治其政令以歲時

合耨于耨以治稼穡趨其耕耨行其秩敘以待有司之政

令而徵斂其財賦比必里反

周官恆解

卷二 地官

七

鄭康成曰邑猶里也考工記耜廣五寸二耜爲耦此言
兩人耦而耕也耜里宰治處漢名街彈今名申明亭於
此合耦使相佐助因放而爲名月令季冬之月令農師
計耦耕事修耒耜具田器是其歲時歟合人耦則牛耦
可知秩敘相佐助之次第待有司之政令而徵斂者歲
之豐凶地之肥瘠不等里宰各治其里於耕獲時上其
狀於遂師遂人等待
其政令而後徵斂也

鄰長掌相糾相受凡邑中之政相贊徙於他邑則從而投

之

五家爲鄰相糾相舉察相受相任恤相贊有貢賦稅斂
則相與助其財師田行役則相與助其力從隨也投之
付以旌節也

旅師掌聚野之耒粟屋粟間粟而用之以質劑致民平頒

其興積施其惠散其利而均其政令凡用粟春頒而秋斂

之

勸音助又音劑津私反

御案勸粟卽助耕公田之稅粟每夫百畝之田什一而稅者也其粟入於廩人舍人倉人而旅師亦分聚於縣鄙諸所與屋粟間粟同備施惠之用鄭康成曰屋粟民有田不耕所罰三夫之稅粟間粟間民無執事者所出一夫之稅粟質劑券也將於秋斂之故有券與積發其積粟也民之不足者差等不使平施惠甚貧者不責以償也散利能償者則春頒而秋斂也

凡新甿之治皆聽之使無征役以地之嫩惡爲之等

新甿或自他國來此或擇里新來者治有所求乞使無征役復之也等復除久暫之等

稍人掌令丘乘之政令若有會同師田行役之事則以縣

師之灋作其同徒輦輦帥而以至治其政令以聽于司馬

大喪帥輦車與其役以至掌其政令以聽于司徒

乘去聲
輦居錄

反

丘乘四丘出一乘之政令其地有司掌之稍人則掌令
之縣師受法于司馬稍人又受法于縣師一乘之卒皆
不肯相保相受者故云同徒作起也作其眾及馬牛車
輦使皆備其旗鼓兵器以帥而至大喪輦車及役遂人
共之稍人有野監之責故亦帥而至治者專聽斷掌者
掌其事以待上之聽斷也凡師至合軍誓眾以後田至
建旗令鼓以後然後司馬治之方其
作民而至則司徒治之故聽于司徒

委人掌斂野之賦斂薪芻凡疏材木材凡畜聚之物以稍

聚待賓客以甸聚待羈旅凡其余聚以待頒賜

余當
為餘

野之賦園山澤之賦也疏材草木之有實者聚卽薪芻疏材木材隨地儲備之稍廣其聚待賓客可以備禮甸小於稍委人所斂惟縣畧中公邑之賦耳則其待賓客羈旅亦謂偶至其地有不給者與遺人所掌委積不同餘聚用有餘者

以式澹其祭祀之薪蒸木材賓客共其芻薪喪紀共其薪蒸木材軍旅共其委積薪芻凡疏材共野委兵器與其野圉財用凡軍旅之賓客館焉

式澹故事多少之成澹言式澹者有定式無濫苛也爲薪細爲蒸木材給張幕之事委積薪芻委積之薪芻也野委兵器委積在野須有兵器守之野圉財用竹木蒲葦魚鼈之屬以上各物蓋皆必其地之所有而後共之委人所在不一此總舉其凡非一處而備共之也軍旅之賓客王朝徵召助征討者歷其地則館焉而共其

地之所有如
上文所云

土均掌平土地之政以均地事以均地貢以和
邦國都鄙之政令刑禁與其施舍禮俗喪紀祭祀皆以地
嫩惡爲輕重之灋而行之掌其禁令

政下文所云非專指征稅也六鄉六遂及公邑均人不
之此謂邦國都鄙也地守山澤虞衡之屬地事三農園
圃之屬地貢其地宜貢之物山川原隰肥瘠因時而異
則所以守之及事與貢今昔異宜故必均平之使平政
令刑禁與禮俗喪祭之紀皆有一定灋特時勢異宜故
皆以地之嫩惡爲輕重之灋記曰五方風氣不齊民生
其間剛柔輕重遲速異宜卽賴此土均
之職均之以上於司徒而制其中也

草人掌土化之灋以物地相其宜而爲之種

相息
亮反

土化以糞種化土之瘠者使
美也物地物與地相宜也

凡糞種駢剛用牛赤緹用羊墳壤用麩渴澤用鹿鹹澇用

類勃壤用狐埴墟用豕疆築用蕢輕費用犬

緹音抵又度
溪反聶土里

反墳音焚又符粉反渴其列反又如字澇音昔一音鴿
類呼九反又音丸埴時力反一音職墟音盧疆其兩反

藥本又作墜呼寬反
又音檻費匹妙反

糞種煮牛羊等骨汁以浸種而種於各等之土也黃則
燒麻爲灰以漬種駢剛赤色剛勁之土赤緹緣色墳壤
土或墳起而糞疏利渴澤澤之潤而可耕者鹹得積水
已去地爲鹹鹵鄭康成曰勃壤粉解者埴墟疏者疆築
疆堅者輕輿輕脆者土田大概有此
九等各以其宜漬種種之則可多獲

稻人掌稼下地以瀦畜水以防止水以溝蕩水以遂均水

以列舍水以澮寫水以涉揚其芟作田凡稼澤夏以水殄

草而芟蕘之澤草所生種之芒種

畜救六反蕘如字列蘇計反又如字舍試夜反

澮古外反寫洗野反蕘音

夷芒模昂反種章勇反

下地低下之地五穀惟稻宜於下地稼種也澮畜水之區防隄也溝以通水遂出間水道列田埂也澮瀉水大溝蓋稻必以水養之故爲豬畜水以待用爲防止水以節其盈歛其水有餘則溝以蕩之欲其皆給則遂以均之以列舍水於田而養苗以澮寫其餘水而不過澮芟害苗之草涉人涉水中去其芟以秀苗卽所以作稻田之澮作治也又言凡下澤之地將以爲稼必於先一年夏清水以殄其草而芟夷之次年乃可稼也又言凡澤生草之處卽不爲田亦可種之芒種芒種芟菰之屬

旱暵其其旱歛喪紀其其羣事

暵呼旱反音旱歛力斃反

雩夏時因旱而雩稻尤急水故雩則供其應出之物葦生下地故喪紀共之

土訓掌道地圖以詔地事道地厯以辨地物而原其生以

詔地求王巡守則夾王車

道說也圖山川形勢之圖地事農圃藪澤之事如荆揚宜稻幽并宜麻之類地厯地之惡者地物工所出者原其生究其所生之地凡非其地所生者則不求也夾王車左圖右書土訓掌圖與下誦訓掌書故夾車而備顧也問

誦訓掌道方志以詔觀事掌道方厯以詔辟忌以知地俗

王巡守則夾王車

辟音遊

方志志四方山川物產告王觀之而知其事方厯四方言語所惡告王辟忌而不苟於言夾車見上

山虞掌山林之政令物爲之屬而爲之守禁仲冬斬陽木仲夏斬陰木凡服耜斬季材以時入之令萬民時斬材有期日凡邦工入山林而掄材不禁春秋之斬木不入禁凡竊木者有刑罰

虞度也度山林之政令而名屬每物各有蕃界守之勿犯禁之勿侵陽南陰北仲冬陽氣孕養之候仲夏陰火熾盛之時互爲斬木以節宜陰陽之氣服車之材耜農之器季斂穉也二者宜用穉木尚柔忍也時斬材斬材有時有期日限日使毋過取邦工爲王取材不禁尊王也春秋非斬木之時不入禁不得入所禁之中斬木也斬四野之木則可竊盜也

若祭山林則爲主而脩除且蹕若大田獵山萊山田之野

及弊田植虞旗於中致禽而珥焉

弊便祭反珥音耳

爲主主當祭事大田獵王親行也萊除其草萊弊田田者止也植猶樹也田止樹旗令獲者致其禽而校其耳以知獲數珥者取禽左耳以効功也

林衡掌巡林麓之禁令而平其守以時計林麓而賞罰之

若斲木材則受灋于山虞而掌其政令

麓釋文作禁

山足曰麓麓雖連山而近平地故山虞不掌林衡掌之禁令與山虞同平其守平其蕃界之守計計其守之功也蓋古授田以井其附近田之林麓各令其人守之恐其恣意取材故設官以巡平而掌罰其得失材大木山虞灋見上文受其灋而使斲材者遵之

川衡掌巡川澤之禁令而平其守以時舍其守犯禁者執

而誅罰之祭祀賓客共川奠

流水曰川禁令不妄取平其守見上以時舍者
令民更番爲守川奠邊豆之實魚鱸蟹蛤之屬

澤虞掌國澤之政令爲之厲禁使其地之人守其財物以
時入之于玉府頒其餘于萬民

國澤大澤不可稼者也但爲之厲禁以生財物而仍使
其地之人守之不私以爲官物也惟有上之所用非民
得有者則以時入于
玉府其餘頒于萬民

凡祭祀賓客共澤物之奠喪紀共其菁蒲之事若大田獵
則萊澤野及弊田植虞旌以屬禽

奠亦邊豆之實芹菲菱芡
之屬屬禽猶致禽而班

迹人掌邦田之地政爲之厲禁而守之凡田獵者受令焉

禁麇卵者與其毒矢射者麇音迷卵力管反

迹人跡迹禽獸者邦田之地蒐狩之常地無妨於民而

便於講武者凡田獵者或王子弟公卿有宗祧之事而

王賜以田或喪紀賓客有司取鮮或獮狩之後聽民入

獵麇麋鹿于王氏昭禹曰禁麇卵生之以其時禁毒矢

殺之以其禮

井人掌金玉錫石之地而爲之厲禁以守之若以時取之

則物其地圖而授之巡其禁令

井礦也金玉藏於石者物地圖井人素知金玉所在故

爲圖以授使毋濫取旁搜以時取非有故不得已弗取

也禁之令之又巡之總欲其勿輕取妄取唐權

萬紀詰鑿山治銀而太宗讓之可以爲萬世法

角人掌以時徵齒角凡骨物于山澤之農以當邦賦之政令以度量受之以共財用

鄭康成曰山澤出齒角骨物大者犀象御案賦者田稅也山澤之農本當有賦若有齒角骨物入于官卽以代田賦而不復徵其粟然或北有彼無此多彼寡則仍以粟米足之所謂政令也以度量爲準不多取也

羽人掌以時徵羽翮之政于山澤之農以當邦賦之政令凡受羽十羽爲審百羽爲搏十搏爲縛

翻戶草反搏徒完反縛除轉反又古

本反

翻羽本審搏縛束羽數名也蓋入於鍾氏以爲車旗之用王氏應電曰羽不可以權度量故以其數

掌葛掌以時徵絺綌之材于山農凡葛征徵草實之材于

澤農以當邦賦之政令以權度受之

掌葛徵蒿以爲絺綌亦徵草貢草
蒞苧之屬以權度可知輕重長短

掌染草掌以春秋斂染草之物以權量受之以待時而頒之

染草染色之草春秋斂者
採花葉皮實各有其時也

掌炭掌灰物炭物之徵令以時入之以權量受之以共邦之用凡炭灰之事

灰給泮練炭之所共多以時入如季秋草木黃落乃伐
薪爲炭仲夏令毋燒灰共邦用之下又云凡炭灰之事
者炭灰之用廣也

掌茶掌以時聚茶以共喪事徵野疏材之物以待邦事凡畜聚之物

鄭康成曰茶茅秀也喪事以著物茶疏材之類因使掌之徵者徵於山澤入於委人 御案茶見於詩者三一苦菜誰謂荼苦也一蒺荼以藕荼蓼也一英荼有女如茶也茶乃茅草秀出之花此掌茶所聚者

掌蠶掌斂互物蠶物以共闔壙之蠶祭祀共蠶器之蠶共

白盛之蠶

蠶是忍反闔衣巾反盛音成

鄭康成曰互物蚌蛤之屬闔猶卷也將并棺先舉下以扇禦溼也蠶器之蠶飾祭器之屬盛猶成也蠶可飾器

白合

園人掌園游之獸禁牧百獸祭祀喪紀賓客共其生獸死

獸之物

鄭康成曰囿游圃之離宮小苑觀處也禁者其蕃衛牧百獸備養眾物也王氏應電曰凡田獵所得可用而不家畜者皆於是乎養之欲用即得不必求之於曠野也生物死物若麋鹿熊罴之類王氏應電曰天官獸人凡所得獸中殺而宜乾之者入於腊人生獲者入於庖人未及用而可畜者入於囿人地官以牧養爲事猛獸不可入囿者養於服不氏夏官以服猛爲義至冥氏掌攻猛獸穴氏掌攻猨獸則秋官除惡之義田獸一事錯見於天地夏秋四官義各有當如此

場人掌國之場圃而樹之果蔬珍異之物以時斂而藏之凡祭祀賓客共其果蔬享亦如之

城郭居民之外以隙地爲公家之圃場人掌之果棗李之屬瓜瓠瓠之屬珍異葡萄桃枇杷之屬享饗耆老孤子

士庶子之類王氏昭禹曰載師以場圃任園地則場人掌國之場圃閭師任民之場圃御案天官甸師已共祭祀之果蔬而復設場人以其所用多且以備不熟也

廩人掌九穀之數以待國之匪頒賜賜稍食以歲之上下數邦用以知足否以詔穀用以治年之凶豐凡萬民之食

食者人四鬴上也人三鬴中也人二鬴下也若食不能人

二鬴則令邦移民就穀詔王殺邦用凡邦有會同師役之

事則治其糧與其食大祭祀則共其接盛數上聲食食下食音副接如字

廩人掌米亦兼主穀賜王所賜予稍食祿廩以歲人之豐歉制國用之數蓋詔於王冢宰而制之凡萬民以下言會計民食之法大概一日食四鬴者為上鬴深尺方尺容六斗四升古尺於今為六寸二分半古一石今

一斗五升二合有奇古一滿今九升七合七勺弱則上年日食一升三合中年日食約一升下半年六合有奇廩人雖掌穀而言民食食則以米計非以穀計也行道曰糴止居曰食古師行無饋餉令道所經有司具之治其糴者廬宿候館雖有飲食以待賓旅而亦有不時之需故必載糶以行也盛柔盛接盛者柔盛必求豐備新舊相接而不窮也

舍人掌平宮中之政分其財守以澹掌其出入

王宮宮正均其稍食后宮內宰均其稍食而米出於廩人平平其給米多少財卽米也納米爲人分米爲出並以太宰之式澹行之

凡祭祀共簠簋實之陳之賓客亦如之共其禮車米管米芻禾喪紀共飯米熬穀以歲時縣種稷之種以共王后之

春獻種掌米粟之出入辨其物歲終則會計其政

管姜呂反飯上

聲縣音懸

會古外反

方曰簠圓曰簋盛黍稷稻粱器禮致饗饋之禮實言其物陳言其數 御案春人共祭祀之米饌人爲盛舍人實之簋簋而陳之春人差擇賓客牢禮之米舍人實之筥載之車故曰共其禮飯所以實口不忍虛也君用梁大夫用稷士用粱熬穀錯於棺旁縣之者欲其燥堅也物九穀六米別而貯之政用穀米之多少

倉人掌粟入之藏辨九穀之物以待邦用若穀不足則止餘漚用有餘則藏之以待凶而頒之凡國之大事共道路之穀積食飲之具

粟穀未去米者問師縣師所徵盡入於此邦用匪頒賜稍食止殺餘漚用君上格外優給者故穀不足則殺

之若有餘則藏以備荒大事喪與戎食
糗糒飲漿醴也此與廩人蓋相濟爲職

司祿

闕

班祿之制孟子云諸侯惡其
害亡而去之此其所以闕歟

司稼掌巡邦野之稼而辨種稂之種周知其名與其所宜
地以爲灋而縣于邑閭巡野觀稼以年之上下出斂灋掌
均萬民之食而調其急而平其與

大司徒土宜之灋載師之物地事草人土化之灋皆掌
其大凡而已司稼則親行其地於百穀之名五土十二
壤所宜周知之故辨其種縣其灋使民爲之天時有早
潦地壤有高卑每歲收獲不齊亦履畝觀之以均斂灋
民居不一其所收有盈歉故均其食急不足
者與有餘者以有濟無以多益寡所謂平也

司官通解

卷二 地官

七

春人掌其米物祭祀其其盞盛之米賓客共其牢禮之米

凡饗食其其食米掌凡米事

食音副

春人掌治米成熟者米物者美惡精粗非一類也凡米事共王后世子之六穀嬪御之穀用以及外內朝充食饗者老孤子士庶子等食米也

饌人掌凡祭祀其盛其王及后之六食凡賓客共其簠簋

之實饗食亦如之

饌同餼昌志反

饌人主炊者炊而共之

藁人掌其外內朝宥食者之食若饗者老孤子士庶子共

其食掌黍祭祀之犬

藁若報反宥如勇反

樂同犒外朝司寇斷獄弊訟之朝內朝路門外之朝亢
食外內朝上直諸吏不歸家食彙人共之謂之亢食者
其人自有廩祿因給事外內朝不暇自爲食而官共之
也士庶子卿大夫之子弟宿衛王宮者養犬豕曰豢

總論爲國以安民爲主民之善否視乎其教比閭族黨之
澶一秉司徒禮樂之教而行之然必授田授職使各安
其居各樂其生而後歡欣從上之教自鄉大夫以下之
長蓋皆就其地之人擇賢者爲之而異其品秩給以祿
養其有善教之士卽由鄉大夫歲時登進然後列於命
數非比閭族黨皆爲之官也前人疑周官設官太多蓋
未達斯義司徒所掌養民之事居多蓋養立而後教興

也先儒疑爲司空錯簡者非先王之視民也如家人父子故自王畿以達於四郊民各有居居各有常征役施舍以聯上下之情德行道藝以爲行習之準卽膳羞祿廩上人日用所需皆不敢稍爲恣縱是以民安其業服其教而勉於爲善後世視養教爲二事貧富不齊秀頑雜出專用刑罰整齊之而間或施舍周恤第張皇補救於一時耳其亦不達於先王之意矣